

La carta de San Pablo a los Romanos

Roma cuto gānare Pablo ī papera cōare gaye

1 ¹ Nati Roma gāna mua. Yu űa Pablo, adi muare papera cōagū. Jesucristore moa īsiri masu űa yu. Yare besecōri Cristo oca masare yu goti ucutoni yare cūni Dios. “No Jesucristore tuorūnugūre īre masogū yiguīji Dios”, yi masare yu goti ucutoni yare cūni Dios.

² Jane mejeju, “Ado bajiro masare queno ejabuagu yigūja yu”, yirocu iti oca goti yucāyiju Dios. Ī gotiado bajiroti ī ocare uca rotiyiju īre goti īsiri masare. Ito bajiri iti oca quenarise uca warā ī oca tuti ucayijarā īna. ³ Ito oca Jesucristo gaye manire riasoa. Īti űami Dios Macu, mani űju. Adi sitaju masu rujuna rujeayiju ī. Ito yicōri David űayoru janerābatia janamiti űayiju Jesucristo. ⁴ Ito bajibo jaguti Dios Macuti űayiju Jesucristo. Ī godaja bero Espiritu Santo ī masirisena, īre macana tudī ī catiroca yiyiju. Itire masicōri, “Dios Macuti űami Jesucristo”, yi tuoia mani īja.

⁵ Jesucristona suoriti queno yiűi Dios yare. Masa jeyaro Jesure īna tuorūnūtoni, ito yicōri yiro robo īna cuditoni, yare cūni Dios. Ito bajiri, “Rētoro quenagū űami Dios”, yi īre rucuburā yirāji masa. ⁶ Muare cūni beseűi Dios. Jesucristo űarā mua űatoni, muare beseűi ī. ⁷ Mua Roma gāna űarocōreti adi papera cōa yu. Buto maiami Dios muare. Ī űarā mua űatoni muare beseűi Dios. Mani Jacu Dios ito yicōri Jesucristo mani űju muare queno yijaro. Ito yicōri mua ya űsiju queno mua wanu quenaroca yijaro īna.

Roma cuto gānare Pablo ī ti āmore gaye

⁸ Ado bajiro muare gotisūoa yu. Co cuto ruyabeto mua Jesure tuorūnure gayere muare busisotiamā masa jeyaro. Ito bajiro īna yija tuocōri, “Queno ya Dios mu”, ya yu. Ito bajiro Diore busia yu, Jesús yare ī ejabuarisena. ⁹ Coji ruyabeto Diore yu busija, muare yiari busisotia yu. Buto yu tuoiarise űarocōnati ī yiro robo Diore cudia yu. Īre yiro robo cudigu, ī Macu Jesús oca masare goti uca yu. “Roma gānare yiari yare senisotiami Pablo”, yi masiguīji

Dios yure. ¹⁰Diore yu busija ito bajiro senisotia yu. Ī ãmoja mua tuju co rumu ejaboguja yu, yirocu ito bajiro senisotia yu. Yoari mua tu warocu tũoĩasotiboja yu. ¹¹Dios gayere muare riaso ãmoa yu, yure ĩ ejabuado bajiro muare cuni ĩ ejabuatonĩ. Ito bajiro muare ĩ ejabuaja, ĩ ocare masicõri buto busa tũoĩa oca sãorã yirãji mua. Ito bajiri buto muare ti ãmoa yu. ¹²Jesucristore tũorũnũrã ña mani. Ito bajiri mua tu ejacõri mua rãca baba cuti ãmoa yu. “Queno Jesure tũorũnũama ña”, yi muare ti masicõri tũoĩa oca sãogũ yiguja yu. Mua cuni ito bajiro ti yu rãca gãmeri busicõri tũoĩa oca sãorã yirãji.

¹³Mua tuo masitoni adi muare gotia, yu mairã yu. Coji ruyabeto mua tuju wa ãmosotiboja yu. Yoari mua tuju wa ãmobjoguti, iti rumuju mua tuju eja masibiticu yu maji. Gaje cuto gãnare yu riasoroca Jesure boca ãmiñi ña. Mua bajiro ti judio masa meje ñarã ñacã ña cuni. Mua tu ñarã cuni Jesure ña masitoni ejabuagu wa ãmosotia yu mua tuju. Ito bajibojarocati mua tuju ejabiticu yu maji. ¹⁴Masa jeyarore riasore ña yure, Dios oca quenarise gayere. Yu ya moare ña, yu oca busirãre riosore, ito yicõri yu oca busimenare cuni riasore gaye. Masirãre cuni riasogu yiguja yu, ito yicõri masimenare cuni. ¹⁵Ito bajicõri Romaju ejacõri, mua tu gãnare cuni Jesús gaye oca quenarise riaso ãmosacõa yu.

Jesucristo oca ñasarise ña, yire gaye

¹⁶Iti oca masa ña tũorũnũja, jeameju ña uabore ñaroca, ñare masoguĩ Dios. Iti oca judio masare riti ejasuoyija maji. Ito bajibojarocati adocãtama no itire tũorũnũgũreti masogu yiguĩ Dios ĩja. Ito bajiri itire masicõri, Jesús gayere bojobicuti gotia yu. ¹⁷Ado bajiro ña iti oca: “Jesure mani tũorũnũja, manire boca ãmicõri, ‘Queno yirã ñama. Ñe seti ma ñare’, yiguĩ Dios. Ado bajiro ucare ñayija jane mejeju gaye: No Diore tũorũnũgũre, ĩre boca ãmigũ yiguĩ Dios. ‘Ñe seti ma ĩre’, yi tigũ yiguĩ Dios ĩre tũorũnũgũre. Ito bajiri catitĩnãgũ yiguĩ ĩ”, yi gotia Dios oca tuti.

Masa jeyaro seti cutirã ñama, yire gaye

¹⁸Ado bajiro ña. Dios macãrucũroju ñagũ, masa ña ñeñaro yirise, ña riojo cudibitire cuni, itire buto ti teguĩ Dios. Ito bajiro ña ñeñaro yija, Dios oca quenarisere gãjerã ña tũobitiroca yirãji ña. Itire junisinicõri buto teguĩ Dios. ¹⁹“Ito bajiro bajigu ñaguĩ Dios”, yi masi jedirãji masa. Īmasiti ito bajiro ña masiroca yĩni Dios. “Ñeñaro yu yire waja quenabeto yu tũbujaroca yigu yiguĩ Dios”, yi masi jedirãji masa. ²⁰Diore tibitibojarãti, “Buto masigũ ñami Dios”, yi tũoĩa mani. Dios mani masiroca yami, ito bajigu ñari. Macãrucũro ĩ rujeorajũju, jeyaro ĩ rujeore gaye ticõri, “Ito bajigu ñami Dios. Iti ña ĩ rujeogore”, yi masirãji masa jeyaro. Ito bajiri, “¿No bajigu ñati Dios? ĩre ti bujabea yu. Ito bajiri yure seti ma”, yi masia ma masare. ²¹“Ito bajigu ñami Dios”, yi masibojarãti, Diore queno rucubobisjarã masa. Ito yicõri, “Queno ya mu”, yire gaye yibisjarã ĩre. Ado bajiroja yiyjarã ña. Rocati bajiro, tũoĩabojayjarã masa. Ñeñarise

riti ña tuoña rētocūja, quenarise ña tuoñabojare gayere ācabojayija ñnare. Ito bajiro bajirā ñari rāitiari ũsi bajiro ũsi cutiyjarā ña. ²²“Buto masirā ña gua”, yibojayjarā ña. Ito yibojarāti masimena ñayjarā ña. ²³Ito bajiro tuoñabojarāti, Dios catitiñagüre queno rŭcubobisjarā ña. Gajero bajirojua yiyjarā ña. Masu jogaroti rujū robo bajiro meni rujeocōri rŭcububojayjarā ña. Wutirāre, jinoare, ito yicōri waiwucu bajirāre cuni rŭcububojayjarā ña.

²⁴Itire ñeñarise gayere ña rŭcubuoja, “Yibesa”, yibisijū Dios. Riojoti ticōayijū ña. “Ña āmoro bajicōato”, yiyijū Dios ñnare. Ito bajiri ñnamasiti ña ya rujū ñeñaro iti tuoñaro bajiroti ñeñaro yi ũyayjarā ña. Ito bajiro yicōri ñnamasiti gāmeri ñeñaro yiyjarā ña. ²⁵Dios oca ñasarisere tuorŭnubiticōri, ruore ocajua tuorŭnuyjarā ña. Diore rŭcubuoado ñno yirā, Dios i menire gayejuare rŭcubuooyjarā masa. “Dise ruyabeto rujeora ña Dios mu. Mu ña rētoro queno yigu”, yi rŭcubuoitiñacōrāja manire. Ito bajiro riti bajitiñaja quena.

²⁶“Ña ñeñaro yirisere jidicā āmobeama”, yi masicōri masare ticōayijū Dios ña. Romiajua cuni, ũmua rāca ña yibojarere jidicācōri, ña romia comasiti yiyjarā ña ña. ²⁷Ito bajiroti ũmua cuni, romia rāca ña yibojarere wasoayjarā ña. Ito bajiri, ña ũmua comasiti, ruje josayjarā ña ña. Ito bajiri ña ũmua comasiti ñeñarise yiyjarā ña. Ito bajiri ñeñaro ña yirisere ña ya rujūmasiti quenabisijū ñnare.

²⁸Diore ña tuo āmobitiado bajiroti, ñeñarise ña yijare, “Yibesa mu”, yibisijū Dios. Riojoti ticōayijū. “Ña āmoro bajicōato”, yiyijū Dios. Ito bajiri ña yi āmoriseti ñeñaro yiyjarā ña ña. ²⁹Jeyaro ñeñarise, yi ũyarā ñama masa. Jeyaro ñeñarise yirāji ña. Ado bajiro baja. Tuote mu. Dios



(Romanos 1.23)

rotirisere tuo tecōri bũto ñeñarise yirāji ñna. Gāji ya gajeoni āmotirā yirāji ñna. Gājire ñeñaro yirona tuoīarā yirāji ñna. Gāji jai busaro ī rucōja, ĩre uorāji ñna. Sīarāji ñna. Gāmeri oca josarāji ñna. Ito yicōri rocati socarāji ñna. Ti tudirā yirāji ñna. Gājerāre oca menirā yirāji ñna. ³⁰Busiturāji ñna. Diore ti terāji ñna. Junisiorise cudirā yirāji ñna. “Ñasagu ña yu”, yi tuoīarā yirāji ñna. “Bũto masigũ ña yu”, yi busirāji ñna. Ñeñarisere yirā, bũto tuoīa rujeorā yirāji ñna. Ñna jacusabatiare yiro robo cudimenaji ñna. ³¹Tuo masimena ñarā yirāji ñna. Ñna busisuoado bajiro yimenaji ñna. Ito yicōri gājerāre ti maimenaji ñna. Gājerā ñeñaro ñna yirisere, ācabojomenaji ñna. ³²“Ito bajiro ñeñaro yirāre jeame ũjuroju cōacuja yu”, yicāni Dios, yi tuoīabojarāti ñeñaro ñna yirisere jidicā āmomenaji ñna. Iti ñeñarise yi ũyacōrā yirāji ñna. Ito yicōri ñna robo bajiro gājerā cūni ñeñaro ñna yija ticōri, bũto wanurā yirāji. “Quena ña iti”, yi tirā yirāji ñna.

Masa ñeñaro ñna yiado bajiroti waja senigũ yiguĩji Dios, yire gaye

2 ¹Gājerāre ti masicōri, “Ñna ñama ñeñaro yirā”, yibesa. Ñna robo bajiroti ñeñarise ya m̄ua cūni. Ito bajiri, “Seti ma guare”, yi masia ma m̄uare. “Ñnare seti ña”, m̄ua yija, “Yure cūni seti ña”, yiado bajiro ya m̄ua. Ñna yiro bajiroti ya m̄ua cūni. ²Ñeñaro yirā ñabojarāti, “Ñna ñama ñeñaro yirā”, m̄ua yija, m̄uare cūni waja senigũ yiguĩji Dios. Masa jeyaro ñeñaro ñna yirise waja, Dios ī senija, yiro robo yigu ñami Dios. “Riti baja iti”, yi masi jedia mani. ³Ñna robo ñeñaro yirā ñabojarāti, “Ñnare seti ña”, m̄ua yija, ñna robo bajiro ñeñaro yirāti ya m̄ua cūni. “Dios mani ñeñaro yirise waja, manire waja senibiquĩji”, yi tuoīabojarāji m̄ua. Ito bajiro yi tuoīabojarocati m̄ua ñeñaro yirise waja m̄uare waja senigũ yiguĩji Dios. ⁴M̄ua ñeñaro yibojarocati, m̄ua ñeñaro yirise waja senirocũ ũsiribiquĩji Dios. ¿Ito bajiri, “Yure waja senibiquĩji”, yi tuoīabojati m̄ua? Ito bajiro meje baja. Manire ti maicōri, mani ñeñaro yirise waja, waja senirocũ ũsirio yibiquĩji Dios. Ñeñaro yirise mani jidicāre āmoami ī. Itire mani jidicātoni yugu yami Dios. ⁵Diore tuo āmobeaa m̄ua. Ito bajiri ñeñaro m̄ua yirisere tuoīa bojori bujabiticōri itire jidicābeaa m̄ua maji. Bũto busa ñeñarise m̄ua yi rētocūja, bũto ñeñarise m̄ua tōbujarocaa yigu yiguĩji Dios. Ito bajiro ī yija ticōri, “Yiro robo yigu ñami Dios”, yi masi jedirā yirāji masa jeyaro. ⁶Masa jeyarore ñeñaro ñna yirise waja ñnare waja senigũ yiguĩji Dios. Ito yicōri quenaro yigoanare, queno yigu yiguĩji ī. ⁷“Yu Macure tuorũnucōri queno yirā ña m̄ua. Ito bajiri yu rāca catitĩnarā yirāji m̄ua”, Dios ī yire tuo āmorā, quenarise riti yisotirāji ñna. Ito bajiro ñna yija ticōri, ñnare catitĩnare gaye ĩsigũ yiguĩji Dios. ⁸Gājerāma ito bajirā meje ñarāji. Gājerāre tuo maibiticōri ñna rucorisere bũto mairāji ñna. Ito yicōri Dios oca quenarise tuorũnumena, ñeñarise yi ũyarāji ñna. Ito bajiro ñna yija bũto ti junisinicōri, ñnare waja senigũ yiguĩji Dios. ⁹Ñeñaro yirā jeyaro bũto tuoīa bujatobiticōri ñeñaro tōbujarā yirāji ñna. Cajero judio masa ñeñaro ñna yirise waja tōbujasurā yirāji ñna. Judio masa meje cūni ito bajiroti ñeñaro ñna yirise waja tōbujarā yirāji ñna. ¹⁰Gājerā quenaro

yigoanareama, “Quenaro yirã ñañi”, yigu yiguji Dios. Ito bajiri ñareama gãjerã rucuborã yirãji. Ito yicõri ñe usiribeto ñarã yirãji ña. Ña ya usiju queno wanu quenarã yirãji ña. Ito bajiro, bajiro yiroja judio masare, ito yicõri judio masa mejere cuni, Jesucristore tuorũncõri quenarise riti ña yijama.

¹¹Mani yi ñasotigore ticõri, manire bese masigũ yiguji Dios. Judio masa, judio masa mejere cuni coro bajiro ti maiguji Dios. ¹²Masa jeyaro ñeñaro yirãji ña. Coriarã Dios i rotirisere masimenati ñeñaro yirãji ña. Ña ñeñaro yija, ña ñeñaro yirise waja, waja senigũ yiguji Dios, i rotirisere masimena ñabojarocati. Gãjerãma Dios i rotirisere masirã ñabojarãti, ñeñarise yirãji ña. Ito bajiri ña cudibitire waja, ñare waja senigũ yiguji Dios. ¹³I rotirisere tuobojarãti ña cudibeja, “Queno yirã ñama”, yibiquji Dios. “Quenarã ñama ña”, yiguji Dios, i rotirise yiro robo cudirãreama. ¹⁴Judio masa meje cuni, Dios i rotirisere masibitibojarãti, coriajuri quenarise yisotirãji ña. Ito bajiro ña yisotija, Dios rotirise ucara tuti manibojarocati, ña masirisena Dios rotirise ña ñare. ¹⁵Ña rucubogore ticõri, “Ña masirisena Dios i rotirise ña ñare”, yi tuoia mani. Ñeñaro ña yija, yoari meje, “Ñeñaro ya yu”, yirãji ña, ña masirisena. “¿No yija ñeñaro yati yu?” yi tuoiarãji ña. Quenarise ña yija, “Quenarise yibu yu”, yi masirãji ña. ¹⁶Mani tuoiarisere masicãguji Jesucristo. Ito yicõri yeyoroju mani yibojarisere masicõguji i. Ito bajiri Dios, Jesure waja senitoni i cõari ramu, masa quenarãre bese masigũ yiguji Jesús. I oca quenarise muare yu riasoja, ito bajiro iti oca muare riasoa yu.

Moisés rotirisere cudirã ñari Dios ñarã ña gua, judio masa ña yire gaye

¹⁷Ado bajiro tuoibojarãji judio masa mua: “Judio masa ñari Moisés ñayorure Dios i rotirise i cure rucubuoã gua. Ito bajiri Dios ñarã ña gua”, yi tuoibojarãji mua. ¹⁸Dios i yiro robo yire gayere masirãji mua. “Dios i rotirise masicõri, quenarisere yi masia gua”, yirãji mua. ¹⁹Mua itire tuoiarã, “Dios gaye masimenare riaso masia gua”, yi tuoiarãji mua. “Ñeñaro yirãre quenarise gaye riaso masia gua”, yi tuoiarãji mua. ²⁰“Tuo masimenare, ito yicõri riaca bajiro tuoiarãre cuni riaso masia gua”, yi tuoiarãji mua. “Dios rotirise masicõri, jeyaro ñasarise masia gua”, yi tuoibojarãji mua. ²¹Gãjerãre queno riasobojarãti, ¿no yija ñare mua riasoado bajiroti yibeati mua? “Rinire, quenarise gaye meje ña”, yi riasobojarãti, ¿no yija muamasiti riniati mua? ²²“Manojo cutibojarãti, gãjerãre yire meje ñaroja”, yibojarãti, ¿no yija muamasiti itire yati mua? Masa ña meni rujeorure ti tebojarãti, ¿no yija iti wi gaye gajeoni riniati mua? ²³“Dios i rotirisere masia gua”, yibojarãti, ñe cudibeã mua. Diore cudimena ñari, ñe rucuborã meje ña mua. Ito bajiro mua yija ticõri, gãjerã cuni Diore rucubomena yirãji ña. ²⁴Dios oca gotirise bajiro bajia muare. Ado bajiro goti iti: “Judio masa ñabojarãti, Dios rotirise gayere cudibeã mua. Mua ito bajija ti masicõri, judio masa meje cuni Diore ñeñaro busituama ña. Ito bajiri muare seti ña”, yi gotia Dios oca tuti.

²⁵“Dios ñarã ña gua”, yi tuoïacõri pĩ gaja wirotasotirãji judio masa. “Diore mua cudija i ñarã ñarãji mua”, ya yu. Ito bajibojarocati, wirotagoana ñabojarãti Diore mua cudibeja i ñarã meje ña mua. ²⁶No Dios rotirisere cudiguti, wirotaya macu ñabojaguti, “Yu yagu ñami i”, yigu yiguji Dios. ²⁷Mua judio masa Dios rotirise ucara tutire rucorã ñabojarãti, ito yicõri wirotagoana ñabojarãti Diore cudibeja mua. Coriarã judio masa meje ñarã, wirotamena ñabojarãti Dios i rotirisere cudirã ñama ina. Ito bajiro ina yija ticõri, “Dios i tiro riojo ñeñaro yirã ña gua”, yi tuoïarã yirãji mua. ²⁸Judio masu goro i ñarise muare gotigu ya yu. Sigũ wirotaru ñabojaguti Diore rucububicu, judio masu goro meje ñami iocũ. ²⁹No Dios bajiro usi cutigu, ito yicõri Dios i rotirise yiro robo cudigu judio masu goro ñaguji iocũ. Judio masa bajiro wirotacõacõri, i ñeñaro yirisere jidicãgũ yiguji i. Ito bajiro bajigu ñaguji Dios rotirisere yiro robo cudigu. Ito bajiro bajigure, “Quenagũ ñami. Ñe seti ma ire”, yiguji Dios. Masa ina, “Quenagũ ñami”, ina yibitibojarocati, “Quenagũ ñami”, yiguji Dioama.

3 ¹Itire tuocõri, ¿no bajiro tuoïati mua? Judio masu ñaja, ¿ñasagu ñare ñati? wirotare gaye, ¿ina yiado bajiro yija quenati? “Judio masu ña yu”, ¿sigũ i yija quenati? ¿No yibeati? ²“Judio masu ña yu”, i yi tuoïaja quena ña. Jaje gotirena suoriti judio masu ñasagu ñare ña. Cajero gorooma judio masare i oca cõañi Dios. ³I oca rucububojarãti judio masa coriarã Diore yiro robo ina cudibeja, ¿no bajirojada? Yiro robo Dios rotirise ina yibitibojarocati Dioama yiro robo yigu ñami. “I yiro robo yibiquji Dios”, ina yi tuoïaja, ¿i yiro robo yibiqujida Dios? ⁴Meje, bajibea. I yiro robo yisotigu yiguji Dios. Masa jeyaro ina socabojarocati, Dioama socagu meje ñami. Jane mejeju Diore goti isiri masu ado bajiro ucayoñi:

Dios mu ña coji ruyabeto yiro robo yigu. “Ado bajiro yicuja yu”, mu yiro bajiroti ya mu. Ito bajigu mu ñajare, “Diore seti ña”, yi masimenaji masa. “Socagu meje ñami Dios”, yi masi jedirã yirãji masa jeyaro, yi ucayoñi Diore goti isiri masu.

⁵Coriarã ado bajiro tuoïabojarãji: “Buto ñeñarise yu yi rëtocuja ticõri, ‘Dios sigũti ñami quenagũ’, yi tuoïarã yirãji gãjerã”, yi tuoïabojama coriarã. Ito bajiro tuoïacõri, “Ñeñaro yu yirise waja, waja Dios i senija, ñeñaro yiguji i cuni”, yi tuoïabojarãji coriarã. ⁶Ito bajiro meje ña. Masa ina ñeñaro ina yirise waja Dios i senija, ñeñaro yigu meje yami Dios. Ñeñarise ma Diore. Ito bajiro masa jeyarore, ñeñaro ina yirise waja seni masiguji Dios.

⁷Gajero bajirojua tuoïabojarãji masa: “Yu ruoja ticõri, ‘Ruogu meje ñami Dios’, yi rucububorã yirãji gãjerã. Ito bajiro, ¿no yija yu ruojati yure waja seniati Dios?” yi tuoïabojarãji coriarã. ⁸“Ñeñaro mani yija ticõri, ‘Dios sigũti ñami queno yigu’, yi rucububorã yirãji gãjerã. Ito bajiro ñeñaro yito mani”, yi tuoïabojarãji coriarã. Guare masa tuorũnume yirona, “Ito bajiroti ruore gaye riasoama Pablo mesa cuni”, yi ruoama gãjerã guare. Ito ina yire waja, quenabeto ina tõbjaroca yirujami Dios.

Mani ñarocōti seti cutirã ña, yire gaye

9 ¿No bajiro tuoĩati mua? Mani judio masa, ¿gãjerã rêto busaro ñasari masa bajiro bajiatu mani? Nena suori bajibea mani. Mani judio masa, judio masa meje ñarã cuni, seti cutirã riti ña mani. Ito bajiro riti masare riasocu ya. 10 Dios oca tuti ado bajiro gotia:

Sĩgũ quena busagu maquĩji.

11 Ñimujua tuoĩa masigũ maquĩji, ito yicōri Dios robo bajiro usi cuti ãmogũ maquĩji.

12 Masa jeyaro Dios oca quenarisere jidicãni, ito yicōri ñeñarise riti yirãji. Nijua sĩgũ quenarise yigũ maquĩji.

13 Ña ya riseri, masari cuma janado bajiro bajiroja. Ña busija masari cuma ñniro bajiro bajiroja, ruore oca riti ña busija. Ña busija, ãña rima robo bajiro junirise budiroja, ña ya oca.

14 Gãjerãre busiturã, oca junisiorise busiturã ñarãji ña. Ito bajiro yicōri gãjerãre rojarã yirãji ña.

15 Rocati tuoĩamenati, gãjire sjarãji ña.

16 Ña waroju ñeñarise yirãji ña. Ñeñaro yicōri, gãjerã bujato mano ña tũbujaroca yirãji ña.

17 Gãjerã rãca queno ñare gaye ña masimenaji ña.

18 “Sẽogũ ñami Dios”, yi tuoĩabojarãti, ire rucubuoemenaji ña, yi gotia Dios oca tuti.

19 Dios i rotirise gaye, mani judio masare cũni, i rotirisere mani cuditoni. Dios i rotirise masibojarãti, itire mani yibeja, “Yũre seti ma”, yi masimenaji mani. Ito bajiri, “Masa jeyarore ña ñeñaro yirise waja, waja senigũ yiguĩji Dios”, yi tuoĩa mani. 20 Nijua sĩgũ maquĩji, “Dios i rotirise ñarocōti cudi jeoa ya”, yi tuoĩagũ. Ito bajiri, “Queno yigũ ña ma, yigũ yiguĩji Dios yũre”, yi tuoĩagũ maquĩji. Dios i rotirise masicōri, “Ñeñaro yigũ ña ya”, yi masi jedia mani ija.

Jesucristore mani tuorũnaja ticōri, manire masogũ yiguĩji Dios, yire gaye

21 “Yũ rotirisere masibitibojarãti queno yirã ñama yũre tuorũnurã. Ñe seti ma ñare”, yi gotiami Dios adi rumuri ija. Jane mejeju cuni ito bajiroti gotisuoyija i rotirise, ire goti isiri masa ña ucare cuni. 22 “No Jesucristore tuorũnugũ, i ñami quenagũ”, yigũ yiguĩji Dios. Judio masa, judio masa meje cuni Jesucristore ña tuorũnaja ticōri, coro bajiroti ti maiguĩji Dios. 23 Mani jeyaro ñeñarise yiana riti ña mani. Ñimujua maquĩji, Dios i ãmorise yigũ. 24 Ito bajibojarocati manire ti maiguĩji Dios. Jesure mani tuorũnaja, “Yũre waja ruyuriobeama ña, ña ñeñaro yirise waja yi jeocõni ya Macu”, yigũ yiguĩji Dios. 25 Dios cõayiju Jesucristore, manire i goda isitoni. Mani rucubuoore rãca, “Ñeñaro ya yirisere waja yi isĩni Jesús i ya rina”, mani yija, mani ñeñaro yirisere acabojogu yiguĩji Dios. Iti masicōri, “Yiro bajiroti yigũ ñami Dios”, yi tuoĩa mani. Jane mejeju masa ña ñeñaro yirisere waja seni usirio yibisiju Dios. “Ña ñeñaro yirise waja goda isigũ

yiguĩji yu Macu”, yire gaye masi yucãyiju Dios. ²⁶Ito bajiro rētayija, “Yiro robo yigu ñami Dios”, mani yitoni. No Jesure t̄orũnũgũret̄i, “Queno yigu ñami”, yigu yiguĩji Dios, ñeñaro mani yirise Jesús ĩ waja yija bero ñajare.

²⁷“Queno yigu ña yu”, Dios ĩ tiro riojo yi masibea mani. Adocãta Dios rotirise yiro robo mani cudiya, “Queno yigu ña yu”, ¿yi masiati mani? Meje itioni yi masimenaji mani. Itire mani yi masibitibojarocati Jesure mani t̄orũnũja, “Queno yirã ñama”, yi tiguĩji Dios manire. ²⁸Dios rotirise mani cudi ãmorã josabojarocati, “Queno yirã ñama”, yibiquĩji Dios. Ito bajibojarocati, “Yu ñeñaro yirisere waja yi isiñi Jesús”, mani yi t̄oĩaja, “Ĩna ñama quenarã”, yigu yiguĩji Dios.

²⁹Mani judio masa Uju riti meje ñaguĩji Dios. Judio masa mejere cuni ĩna Ujuti ñami Dios. ³⁰Ito bajiri sigũ ñabojaguti masa jeyaro Uju ñami Dios. Ito bajiri sigũ judio masu, Jesure ĩ t̄orũnũja ticõri, “Quenagũ ñami”, yigu yiguĩji Dios. Ito yicõri judio masu meje cuni Jesure ĩ t̄orũnũja ticõri, “Ĩ ñami quenagũ”, yigu yiguĩji Dios. Wiro mani tabeja, wiro mani taja cuni ñasarise meje ña Dios ĩ tija. ³¹Itire t̄oĩacõri, ¿Dios ĩ rotirise jidicãrũjati mani? No yicõri jidicãmenaji mani. Mani Jesure t̄orũnũrã buto busa Dios ĩ rotirisere cudirã yirãji mani.

Ado bajiro bajiyiju Abraham ñayoru, yire gaye

4 ¹Mani ñicu Abraham ñayorure t̄oĩacõri, ¿no bajiro yi t̄oĩati mani? Ito yicõri, ¿no bajiro ĩ yija ticõri, ĩre boca ãmiyijari Dios? ²Queno ĩ yirise ticõri, ¿ire boca ãmiyijari Dios? Ito bajiro meje ña. Ito bajiro bajijama, “Queno yigu ña yu”, yiboru Abraham. Dios ĩ tiro riojo, “Queno yigu ña yu”, yi t̄oĩabisiju Abraham. ³Dios oca ado bajirojua gotia: “Abraham Diore queno t̄orũnũyiju. Ito bajiri, ‘Queno yigu ñami’, yi boca ãmiyiju Dios Abrahamre”, yi gotia Dios oca. ⁴Ado bajiro m̄are goti masiogũ ya yu. Sigũ ĩ moaja, ĩre moare rotigu rocati meje waja yiguĩji ĩ. ĩ moare ticõri waja yiguĩji ĩ. ⁵Diore t̄orũnũre gayeama, ito bajiro meje baja. ĩre t̄orũnũrãre queno boca ãmiguĩji Dios. ĩna queno yire waja, waja yirocu meje ĩnare boca ãmigũ yiguĩji Dios. ĩre ĩna t̄orũnũjare, ĩnare boca ãmigũ yiguĩji Dios. ĩre ĩna t̄orũnũja ticõri, “Queno yirã ñama”, yigu yiguĩji Dios. ĩna queno yire waja, waja yirocu meje ito bajiro yigu yiguĩji Dios. ĩre ĩna t̄orũnũjare, ĩnare boca ãmigũ yiguĩji Dios. ⁶Itire t̄oĩagũ David ñayoru cuni ado bajiro yiyiju: “Jeyaro ĩna yigore t̄oĩabicuti, ‘Queno yirã ñama. Ñe seti ma ĩnare’, yigu yiguĩji Dios ĩre t̄orũnũrãre. Ito bajiro Dios ĩnare ĩ boca ãmija, wanũ quenarã yirãji ĩna”, yiyiju David ñayoru. “Wanũ quenarã yirãji”, yirocu, ⁷ado bajiro yiyiju David:

Ñeñaro ĩna yirisere Dios ĩ ãcabojoja, ito yicõri iti ñeñarisere ĩ ruyurioja bero queno wanũ quenarã yirãji ĩna.

⁸No ñeñaro ĩ yirisere waja Dios ĩ senibeja, queno wanũ quenagũ ñaguĩji, yiyiju David ñayoru.

⁹Iti wanũ quenare, judio masa wiro tagoana gaye riti meje ñaroja iti. Judio masa meje ñarã cuni wiro tabitibojarãti Diore ĩna t̄orũnũja wanũ quenarã

yirãji. Abraham ñayorure mucana tũdi tuoĩate mua. “Yũre tuorũnũgũ ñami Abraham”, yi ticõri, “Queno yigũ ñami ĩ. Ñe seti ma ĩre”, yiyijũ Dios. ¹⁰Dios ito bajiro ĩ yija, ¿Abraham ĩ wiro taja bero ñayijari? Ito bajirojũa meje bajiyija. Abraham ĩ wiro taroto riojũa, “Queno yigũ ñami Abraham”, yiyijũ Dios. ¹¹Abraham ĩ tuorũnũja ticõri, “Queno yigũ ñami”, yi ĩre boca ãmiyijũ Dios. ĩre ĩ boca ãmija berojũa ĩre wiro ta rotiyijũ Dios. “Riti Dios yagũ ña yũ”, yi tuoĩacõri, Dios ĩ rotiado bajiro yigũ wiro tayijũ Abraham ñayoru. Ito bajiri Abrahamre ĩ wiro ta rotiroto riojũa, “Queno yigũ ñami Abraham”, yiyijũ Dios, yi tuoĩa masia mani. No Diore tuorũnũgũ, judio masũ meje ñabojaguti, wiro ta ecorũ meje ñabojaguti, “Ĩ ñami quenagũ”, yigũ yigũiji Dios. Dios ĩ boca ãmiana, Abraham janerãbatia robo bajiro bajirã ñarãji ĩna ĩja. ¹²Wiro tagoana ñicũ cũni ñaguĩji Abraham. Wiro ĩ taroto riojũa Diore tuorũnũyijũ Abraham. Wiro ĩna tarajũna sũori meje ĩna ñicũ ñaguĩji Abraham. ĩ robo bajiro, Diore ĩna tuorũnũjare, judio masa ñicũ ñaguĩji Abraham. Judio masa ñicũ ñaguĩji ĩ. Judio masa ĩna ñare waja meje, Diore ĩna tuorũnũre waja judio masa ñicũ ñaguĩji Abraham. Ito bajiri Abraham robo bajiro Diore tuorũnũrã, ĩ janerãbatia robo bajirã ñarãji ĩna.

Jesure mani tuorũnũja Dios ĩ goticãdo bajiroti rãtaro yiroja, yire gaye

¹³Jane mejejũ ado bajiro goticãyijũ Dios Abrahamre: “Macãrucũro sita ñarocõti mũre, mũ janerãbatiare cũni ĩsigũ yigũja yũ”, yiyijũ Dios. Ito bajiro gotiyijũ Dios Abrahamre ĩ rotirisere yiro robo ĩ cudija ticõri meje. “Yũre tuorũnũcõri, queno yigũ ñami Abraham”, yi tuoĩacõri ito bajiro cũyijũ Dios Abrahamre. ¹⁴“Dios ĩ rotirisere gũa cudire waja, ‘Ado bajiro masare ĩsicũja yũ’, ĩ yiro bajiroti gũare ĩsigũ yigũiji Dios”, yi tuoĩabojama coriarã. ĩre tuorũnũmenareti ĩ rotirise ĩna cudire waja Dios ĩ ĩsija ĩre tuorũnũbojarã ya mani. Ito yicõri, “Yũre tuorũnũrãre ado bajiro ĩsicũja yũ”, yi Dios ĩ goticãre buroti bajiro baja ito cũni. ¹⁵Ito bajiro meje ña. “Ĩ rotirisere masibojarãti ĩna cudibeja ticõri, ĩnare junisinigũ yigũiji Dios”, yi tuoĩa mani. Dios ĩ rotirise manija, “Dios ĩ rotirisere cudibeama masa”, yi masibitiboana mani.

¹⁶Abrahamre ti maicõri, “Yũre mũ tuorũnũja, rocati waja mano mũre ĩsigũ yigũja yũ”, yiyijũ Dios Abrahamre. Mani Diore tuorũnũja, mani ñicũ bajiro bajigũ ñaguĩji Abraham. Ito bajiri Dios rotirise cudirã riti meje, Abrahamre Dios ĩ goticãre boca ãmirã yirãji ĩna. No Abraham robo bajiro Diore tuorũnũrã Dios ĩ goticãre boca ãmirã yirãji ĩna. ¹⁷Dios Abrahamre ĩ goticãdo bajiroti, ucare ñayijũ jane mejejuti. Ado bajiro bajiyijũ: “Jaje sitari gãna ñicũ ñarocũ mũre cũa yũ”, yiyijũ Dios Abraham ñayorure. Ito bajiro Dios ĩ yija tuocõri, ĩ gotiro bajiroti rãcũbuoyijũ Abraham. Ito bajiri mani ñicũ ñarocũ cũyijũ Dios Abrahamre. Sãogũ ñami Dios. ĩti ñami godanare catiroca yigũ, ito yicõri jeyaro rujeoru.

¹⁸“Mũ janerãbatia jãjarã ñarã yirãji”, Abrahamre Dios ĩ yiroca, rãa macũ ñayijũ Abraham maji. “Dios ĩ gotire, rãtaro yiroja”, yi tuoĩa ñayijũ Abraham, rãa manibojaguti. ¹⁹Abraham cien rodoricõ tũjabojaguti, ito yicõri ĩ manijo Sara,

bũco ñabojarocati, “Rĩa macũja yũ”, yibisijũ Abraham. Bũcũgũ rĩa cutiado macũ ñabojaguti, “Ija rĩa cutibicũja yũ”, yi tũoĩabisijũ ĩ. “Dios ĩ gotirise riti ña”, yi tũoĩa jidicãbisijũ Abraham. ²⁰“Dios ĩ gotirise ñaro bajiroti rẽtaro yiroja”, yi tũoĩayijũ Abraham. “Ĩ gotiado bajiro yibicũ yigũji Dios”, yire gaye tũoĩabisijũ Abraham. Ito bajiri buto bũsa tũoĩa oca sũcõri, “Ĩ rotiado bajiroti yigũ yigũji Dios”, yi tũoĩayijũ ĩ. Ito bajiro tũoĩacõri, “Rẽtoro masigũ ñami Dios”, yi rũcũbuoyijũ Abraham, Diore tũorũnũgũ. ²¹“Dios buto masigũ ĩ ñajare, ĩ goticãdo bajiroti yigũ yigũji”, yi tũoĩasotiyijũ Abraham. ²²Ito bajiro ĩ yija ticõri, “Queno yũre tũorũnũgũ ñami Abraham, ito yicõri queno yigũ ñami ĩ”, yiyijũ Dios. Ito bajiro gotia Dios oca tuti.

²³Abraham ĩ sũgũre yĩari meje ucare ñayija iti. ²⁴Manire yĩari cũni ucare ñayija iti. Diore mani tũorũnũja manire boca ãmicõri, “Quenarã ñama ĩna. Ñe seti ma ĩnare”, yigũ yigũji Dios. ĩ Dioti ñami, mani Ʋjũ Jesure, ĩ godaroca mũcana tũdi ĩ catiroca yirũ. ²⁵Mani ñeñaro yirise ñarocõti waja yi jeorocũ godaũni Jesús. ĩ godaja bero mũcana tũdi catiũni, “Ñe waja ruyuriobeama ĩna. Queno yirã ñama ĩna”, Dios ĩ yitoni.

Jesure mani tũorũnũja ñe seti mana ña mani, yire gaye

5 ¹Jesure mani tũorũnũja, “Ĩna ñama quenarã. Yũre waja ruyuriobeama ĩna”, yigũ boca ãmiguĩji Dios manire. Ñarocõreti quenoyijũ Jesús. Ito bajiri Dios rãca queno ñare gaye ña manire. ²Jesure mani tũorũnũja, manire ti maicõri manire masogũ yigũji Dios. Ito bajiri ĩre tũorũnũcõri queno wanũrãji mani. “Rẽtoro quenagũ ñami Dios. ĩ quenaro yirise manire yĩari jidicãgũ yigũji ĩ”, yi wanũ quenarãji mani. ³Iti gaye riti meje wanũ quenarãji mani. Mani ñeñaro tũbũjabojarijũ cũni wanũcõrãji mani. “Ñeñaro yũ tũbũjabojaja cũni Jesure masicõri buto bũsa tũoĩa oca sũogũ yigũja yũ”, yi tũoĩa mani. ⁴Ito bajiro mani bajija ticõri, “Queno yũre tũorũnrã ñama ĩna”, yigũ yigũji Dios. Ito bajiro Dios ĩ yija, “Yũre masogũ yigũji”, yi tũoĩa yucãrãji mani. ⁵Ito bajiro tũoĩa yucõri, bojori bũjare gayere bũjamenaji mani. “Dios manire masogũ yigũji”, yi tũoĩacõa mani. Manire buto maiami Dios. Ito bajiri manire Espĩritu Santore queo sãni Dios. Espĩritu Santo mani rãca ĩ ñatĩñajare, “Yũre maiami Dios”, yi tũoĩa mani ĩja.

⁶Ñeñaro mani yirise mani jidicã masibeto, ito yicõri, “No yi masia ma yũre”, mani yi tũoĩaroca, itocõ Dios ãmoro bajiro ejayija, Cristo manire ĩ goda ĩsirijũ. ⁷Sĩgũ queno yigũ ñabojarocati, ĩre goda ĩsigũ queno maquĩji. Sĩgũ queno yigũ ĩre goda ĩsigũ ñaguĩji gajea. ⁸Cristoama mani ñeñaro yirã ñabojarocati, manire goda ĩsiũni ĩ. Ito bajiri, “Manire buto maiami Dios”, yi tũoĩa masia mani. ⁹Jesús mani ñeñaro yirise waja, ĩ ya rĩna waja yi godaũni. Ito bajiri itire ticõri, “Yũre waja ruyuriobeama ĩna. Ñe seti ma ĩnare ĩja”, yigũji Dios manire. “Yũre yĩari bũsigũ yigũji Cristo. Ito bajiri, yũre junisinibicũ, ñeñaro yũ tũbũjaroca yibicũ yigũji Dios”, yi tũoĩa masia mani. ¹⁰Diore mani wajacũ cutibojarocati maji, manire yĩari goda ĩsiũni Cristo. Ito bajiro yĩni ĩ, Dios rãca mani queno ñatoni. Dios rãca queno mani ñaroca, adocãta Jesús mũcana caticõri queno

busa manire yigũ yigũiji. Jeame ẽjũroju mani wabore ñaroca, manire masogũ yigũiji Jesús. ¹¹“Jeame ẽjũroju wabore gaye manire masogũ yigũiji”, yirona buto wanũrãji mani. Ito yicõri, “Yũ ñarã ñama. Ñe seti ma ñare”, yigũ yigũiji Dios. Ito bajiro yigũiji Dios, mani Ʋju Jesucristo manire i goda ñsire ñajare.

Cristo ito yicõri Adán ñayoru ña bajire gaye

¹²Dios i cajero rujeosũoru i ñayiju Adán wame cutigu. I cajero ñeñarise yisũoyiju. I ñeñaro yisũorajuna, jeyaro macãrũcũro gãna ñeñaro yisũoyijarã. Ito yicõri godasũoyijarã ña. Mani ñeñarise yirã ñari, goda jedirã yirãji mani jeyaro. ¹³Dios i rotirise, Moisésre i jidicãroto riojua, masa ñeñarise yicãnajũ ñayijarã ña. Ñeñaro ña yibojarocati, Dios i rotirise manijare maji, “Yũ rotirisere tũorũnũbeama ña”, yibisiju Dios maji. ¹⁴Dios i rotirise manijare, ñeñaro yiyijarã masa. Adán i ñaratũajũ, ito yicõri Moisés i ñarajũjũ cuni, ito bajiroti bajicõyiju. Ito bajiri goda jedicoayijarã ña ñarocõti. Ña ñeñaro yire, Adán i Diore cõdibitire gaye bajiro meje yiyijarã ña. Adãnti ñayiju cajero ñeñarise yire gayere mũocõari masũ. Mani i bero gãna jeyaro ñeñaro yirã riti ña. Manire ticõri, “Ñeñaro yirã riti ñama”, yigũiji Dios. Ito bajibojarocati Adán i ñaja bero yoari sigũ i robo bajiro bajigũ meje quenarise riti yigũ ñayiju. I ñayiju Jesucristo. I ñayiju cajero Dios rotirise cõdi jeogu. Mani ñeñaro yirise waja i waja yi ñsirena suoriti, “Yũre waja ruyuriobeama. Ñe seti ma ñare ña”, yi tisũoyiju Dios manire.

¹⁵Adán ñeñaro i yigore, ito yicõri Dios manire queno i yigore rãca babo masia ma. Masare Dios i ti mairise, iti ña buto busa quenarise. Adán sigũ ñabojaguti ñeñaro i yirajuna suoriti masa jãjarã godayijarã. Dioama manire ti maicõri, Jesucristore cõañi manire i goda ñsironi. Jesús sigũ ñabojaguti jãjarãre jeameju uabonare masoyiju i. Ito yicõri Jesús i sigũti manire ti maicõri, waja senibicũ yigũiji i. Iama mani catitiñaroca yigũ yigũiji. ¹⁶Dios manire i queno yigore ito yicõri Adán i ñeñaro yigore rãca babo masia ma. Adán sigũ i ñabojarocati ñeñaro i yisũore ticõri, “Masa jeyaro ñeñaro ña yirise waja tõbũjarã yirãji ña”, yiyiju Dios. Ito bajibojarocati, masare ti maicõri, Jesure cõañi Dios, masare i goda ñsironi. Ito bajiri ñeñaro tũorũnũja, ñeñaro mani yirisere ãcabojogu yigũiji Dios. Ito bajiri ñeñaro yirã mani ñabojarocati, “Queno yirã ñama. Ñe seti ma ñare”, yigũ yigũiji Dios. ¹⁷Adán sigũ ñabojaguti, i ñeñaro yijare, masa jeyaro godarã yirãji. Ito bajibojarocati Jesús manire i goda ñsirena suoriti mani ñeñaro yirisere ãcabojogu yigũiji Dios. Ito yicõri manire ti maicõri, “Quenarã ñama ña. Ʋmacũju yũ Macũ Jesucristo rãca catitiñarã yirãji ña”, yigũ yigũiji Dios.

¹⁸Adán sigũ ñabojaguti, ñeñaro i yijare masa jeyaro ña tõbũjaroca yigũ yigũiji Dios. Ito bajibojarocati Jesús sigũ ñabojaguti queno i yijare, “Ñeñaro yũ yirisere itire ãcabojoya Dios mũ”, yi masirãji masa jeyaro. Ito bajiro ña yi rũcũbuoja tũocõri, “Quena ñama. Catitiñarã yirãji”, yigũ yigũiji Dios. ¹⁹Dios i rotiro bajiro cõdibisiju Adán. Adán sigũ ñabojaguti, ito bajiro i yija, jãjarã

masa ñeñaro yisuooyjarã ija. Ito bajibojarocati, Jesuama ñaro bajiroti cadiyijũ Diore. Ito bajiro i yija jãjarã masa ñeñaro ña yirise Dios i cõa ñisigoana ñama ija. Ito bajiri, “Queno yirã ñama”, yicõri ñinare boca ãmigũ yiguĩji Dios.

²⁰Dios i rotirise jidicãñi Moisésre, “Ñeñaro yirã ña gua”, mani yi tuoña jeditoni. Ñeñaro mani yibojarocati, “Dioama buto busa manire ti maiguĩji”, yi tuoña mani ija. ²¹Mani ñarocõreti ñeñaro mani yirise waja seti ña. Ito bajiri ñarocõti godarã yirãji mani ija. Ito bajibojarocati Dioama manire ti maiguĩji. Dios manire ti maicõri, Jesucristo mani Ujũre cõañi, ñeñarise jeyaro i quenotoni. Ito bajiri Dios manire ti maicõri, “Queno yirã ñama ña”, yicõri, manire boca ãmigũ yiguĩji. Ito bajiri catitiñarã yirãji mani ija.

Ñeñarise jidicãna ñari Cristona suoriti catitiñarã yirãji mani, yire gaye

6 ¹Itire masicõri, çñere yirũja, yi tuoĩati mua adocãta? çÑeñaro yirejuare yitĩnarũjati manire, Dios i mairise buto busa manire i ñotoni? ²Ñena suoriti yimenaji mani. Ñeñarisere jidicãgoana ña mani. Ito bajiri mani Cristo ñarã ñabojarãti, çñeñarise yi uyarãjida mani? Meje ñeñarise yi uyamenaji mani. ³çIdé gure gayere tuo masiati mua? Idé gu roticũ mani, “Cristo ñarã ñama”, gãjerã ña yi ti masitoni. Riti i ñarã ña mani ija. Ito bajiri Cristo i godacãre ñajare, i robo bajiroti godacãna ña mani cuni. ⁴Mani idé gucatijũ, Cristo rãca yuje cũado bajiro bajicũ mani. Cristo i godaja bero mucana tũdi i catiroca yiyijũ mani Jacũ Dios i masirisena. Mani ñeñaro yirise jidicãtoni ito bajiro yiyijũ Dios. Ito yicõri quenarise mani yitoni, i masirisena manire ejabũagũ yiguĩji Dios.

⁵Cristo ñarã mani ñaja, i godarajũ i robo bajiro godana ña mani cuni. Ito yicõri i ñarã mani ñaja, mucana tũdi i catiado bajiroti, mani cuni tũdi caticõri i rãca catitiñarã yirãji. ⁶Cristo yucutẽoju i godado bajiroti, mani ñeñaro yi ãmorise godayija. Ito bajiri ñeñaro yi ãmorã meje ña mani ija. Ñeñaro mani yi ãmorisere jidicã masia mani. Ito bajiri ñeñarise yi uyamenaji mani ija. ⁷Masa godarã, ñeñaro ña yibeto bajiro mani cuni ñeñaro yi uyamenaji. ⁸Ñeñarise jidicãgoana mani ñaja, Cristo rãca godacãna robo bajiro bajia mani. Ito bajiri, “Í tũdi catiado bajiroti, mani cuni tũdi catirã yirãji”, ya mani. ⁹“Godabojaguti mucana tũdi i catiroca yiyijũ Dios Cristore. Mucana tũdi juaji godabiquĩji Cristo”, yi tuoña mani. Mucana tũdi juaji godare manojã ire. ¹⁰Cristo cojiti godañi, mani ñeñaro yirisere cõagũ. Mucana tũdi caticõri, Dios i ãmoro bajiro yi ñagũ ñami i ija. ¹¹Ito bajiro tuoĩarũja manire cuni. “Yũ ñeñaro yirisere jidicãcõri tũdi itire yi uyabicũja yũ mucana. Cristo yagũ ñacõri, Dios i ãmoro bajiro yi ñagũ yiguĩja yũ”, yirũja manire.

¹²Ñatĩñaroti meje ña mani ya rujũ. Ito bajiri mua ya rujũ ñeñaro iti tuoĩaro bajiroti ñeñaro yi uyabesa. Buto ñeñarise yiroto ãmbojarocati ñemecutirũja manire. ¹³Mua ya rujũ ñeñaro iti tuoĩaro bajiroti ñeñaro yibitirũja muare. Mua ña, jeame ujuuroju mua wabore ñaroca Jesús i masogoana. Ito bajiri Dios i ãmoro bajiro riti mua ya rujũna quenarise riti mua yitĩñaja quena. ¹⁴Ire cũdirã mani ñaja, ñeñarise yire gaye ãmobeto

yiroja manire. “Dios ï rotirisere yu cudibeja, jeameju yure cõagũ yiguĩji”, yi tuoia güirã meje ña mani. “Jesure yu tuorũnũja, yure ti maicõri, yure masogũ yiguĩji Dios”, yi tuoia wanũrã ña mani.

Ñeñarise riti mani yi uyaja mani Uju robo bajirise ña, yire gaye

¹⁵ “Dios ï rotirisere yu cudibeja, jeame ñjuroju yure cõagũ yiguĩji ï”, yi tuoia güicõri, ñeñarise yibitirũja manire. “Yure ti maicõri, yure masogũ yiguĩji Dios”, yi tuoĩarã ñari, Dios ï ãmoro bajiro riti cudirũja manire. ¹⁶ Gãjire mua tuorũnũja, ï ñaguĩji mua uju. Ito yicõri ïre moa ïsiri masa ñarãji mua. Ito bajiro ñeñarise riti mua yi uyaja, mua uju robo bajiro tujaroja ñeñarise ïja. Ito bajiro ñeñarise mua yija, ñeñarisere jidicã masimenaji mua. Ito bajiro mua yija, jeame ñjuroju warã yirãji mua. Ito bajibojarocati, Diore mua tuorũnũja, “Queno yirã ñama. Seti ma ñnare”, yigũ yiguĩji Dios. Itire masirãji mua. ¹⁷ Iti rãmũju, ñeñarise mua yija, mua uju robo bajiro bajiyija ñeñarise. Ito bajiri ñeñarise yi uyayija mua maji. Adocãtama Dios ocare riasoticõri itire cudia mua. Ito bajiri ïre rũcũborã ña mua ïja. Iti masicõri, “Queno ya Dios mũ”, ya yu ïre.

¹⁸ Ñeñaro yire gaye cudirã meje ña mua ïja. Diore cudirã ñari quenarise riti yi ãmorã ña mua ïja. ¹⁹ Queno cõia gotire rãca mũare goticũ yu, queno mua tuo masitoni. Iti rãmũju buto ñeñarise yirã ñayija mua maji. Adocãtama quenarise riti mua yi ñaja quena. Quenarise riti mua yija, Dios ï ãmorise yirã yirãji mua.

²⁰ Iti rãmũju ñeñarise riti yirã ñari quenarisere yibisija mua maji. Dios ï ãmoro bajiro yirã meje ñayija mua maji. ²¹ Itijũju, ñeñarise mua yirajũju, ¿ñeoni quenarise bujacati mua? Bujabisija mua. Adocãta, iti rãmũju ñeñarise mua yigore, mua tuoĩaja, bojoriseti bajia ïja. No ñeñarise riti yirã, ñna godaja bero jeame ñjuroju warã yirãji ñna. ²² Mua adocãta ñeñarisere cudirã meje ña mua ïja. Ñeñarise jidicãcõri Diore cudirã ña mua ïja. Dios ï ãmoro bajiro riti ïre cudirã ñari, buto busa ïre cudi ãmorã yirãji mua. Ito bajiro mani yija, ï rãca riti ñatĩñarã yirãji mani. ²³ Mani ñeñaro yirise waja, waja yirã bajiro godarã yirãji mani. Ito bajiri seti cutirã ñari Dios tu queno eja masimenaji mani. Jesucristo mani Ujare mani tuorũnũjama, ñe waja manoti catitĩñare gaye ïsigũ yiguĩji Dios manire.

Romio manũju cutigo, iso manũju rãca riti ñaja quena, yire gaye

7 ¹ Yu ñarã, mua ña rotire gaye masirã. Mani catirocõ rotire gaye cudirãona ña mani. Mani godaja berojuama, no yicõri itire cudi masia manoja manire. ² Rotire gaye ado robojuã gotia manire: Romio manũju cutigo, iso manũju rãca riti ñaja quena, ï catirocõ. Iso manũju godaja bero, rotire gaye cudibeco meje yamo iso, gãjire iso manũju cutija. ³ Iso manũju ï catibojarocati, gãji rãca iso ñaja, manũju cutibojagoti ajeri maso ñamo isoõcõ. Ito bajibojarocati iso manũju godaja bero gãji rãca iso manũju cutija, Dios rotirise cudibeco meje yamo iso. Ito bajiro yigo manũju godagoro ñari ajegoõcõ meje ñamo iso.

⁴Ito bajiroti yu ñarã Cristo ñarã ña mani ïja. Iti rumu Cristo ï godaroto riojua mani uju robo bajirise ñayiju rotire gaye maji. Adocãtama Jesucristo manire ï goda ïsirajuna suoriti mani uju robo bajirise meje ña ïja. Cristo ïjua ñami mani Uju ñasagu. Ito yicõri ï ñarã ña mani. Cristo ï godaja bero ï tãdi catiroca yĩni Dios. Ito bajiro yĩni Dios ïre mani queno moa ïsi masitoni. ⁵Jesure mani masiroto riojuaju, mani ãmoriseti yicu mani maji. Dios ï rotirise masibojarãti itire cudi ãmobicicu mani. Ito bajiri mani ya ruju ñeñaro iti tũoïaro bajiroti ñeñaro yicu mani maji. Dios ï rotirisere cãdimena ñari, buto busa ñeñarise yicu mani. Ito bajiri jeame ãjuroju warona ñacu mani maji. ⁶Adocãtama, “Dios ï rotirisere yu cãdibeja, jeameju yure cõagũ yiguïji ï”, yi tũoïa gũirã meje ña mani. Cristore buto tũorũnua mani adocãta. “Cristore yu tũorũnua yure masogũ yiguïji Dios”, yi tũoïarã ña mani ïja. Espiritu Santo mani ya usiju ñagũ, ñeñarise yire jidicãroca yami. Ito yicõri, quenarisejua wasoaroca yami ï.

Manireti ña ñeñarise, yire gaye

⁷Dios ï rotirise, ¿no bajiro yirã yati mani? “Ï rotirise ñeñarise ña”, ¿yirujati mani? Meje yibitiruja manire. Dios ï rotirise manire gotia, “Iti ña ñeñaro yire gaye”, mani yi masitoni. Dios rotirise iti manija, “Iti ña ñeñaro yire gaye”, yi masibitiboana mani. Adi gaye tũoïate mua: “Gãji ya gajeonireti uobesa”, yi gotia Dios rotirise. Ito bajiro ï yibeja, “Gãji ya gajeoni ãmotire ñeñarise ñaroja”, yi masibitiboruja yu. ⁸Ito bajiri iti rotirise masicõri, ñeñaro yigu ñari buto busa gãji ya gajeoni ãmoticu yu. Iti rotire masibiticõri buto gãji ya gajeoni ãmotibiticu yu maji. ⁹Dios ï rotirise yu masiroto riojua maji, “Buto queno yigu ña yu”, yi tũoïabojacu yu maji. Dios ï rotirisere masigũ ñabojaguti, buto busa ñeñarise yi ãmocu yu maji. “Ñeñaro yigu ña yu. Ito bajiri jeame ãjuroju wacu yiguja yu”, yi masibojacu yu, yi masirea. Ito bajiri buto bojori buja ñacu yu. ¹⁰Ï rotirise cũni Dios, masa ñna queno ñatoni. Yuama Dios ï rotirise masicõri, buto bojori buja ñacu. Ñeñarise yicõri, “Jeame ãjuroju wacu yiguja yu”, yi tũoïacu yu. ¹¹Yu ñeñaro yirise tũoïacõri, buto ñeñaro yi ãmocu yu. Yu ñeñaro tũoïarise yure ruoyija. Dios ï rotirisere cudi ãmobicicu yu. Iti rotirise masicõri, “Jeame ãjuroju wacu yiguja yu”, yi masibojacu yu. Ito bajiri buto bojori buja ñacu yu.

¹²Iti rumu maji ito bajiro tũoïabojacu yu. Adi rumuri ado bajiro ya yu ïja. Jeyaro Dios ï gotirise quenarise ña. Ito bajiri Dios ï rotirise riojo gotirise ñaroja, ito yicõri quenarise. ¹³Adi rotirise quenarise ñabojaroti, ¿mani jeame ãjuroju waroca yirojada? Meje ito bajiro meje bajia. Mani ñeñaro yire, mani jeame ãjuroju waroca yiroja. Dios ï rotirise mani masija bero, ñeñaro mani yirise, “Ñeñaro ya yu”, yi tũoïa mani. Ñeñaro yire masicõri, “Jeame ãjuroju wacu yiguja yu, ñeñaro yigu ñari”, yi tũoïa masia mani. Ito yija Dios rotirise masibojarãti, itire mani cãdibeja, iti ña buto busa ñeñarise.

¹⁴Mani masia, Espiritu Santona suoriti ï rotirise cũni Dios Moisés ñayorure. Manire Espiritu Santo ï ejabuabeja, Dios ï rotirisere cudi

masimenaji mani. Yũ masia, ñeñaro yigu ña yũ. Ito bajiri ñeñaro yitiña yũ. ¹⁵¿No yija, ito bajiro yigujã yayũa yũ? Masibea yũ itire. Queno yũ yi ãmobarise gaye yibea yũ. Ñeñaro yũ yi ãmobarisejũare itijũare ya yũ. Masibea yũ. ¿No yija itire yigujã yayũa yũ? ¹⁶Ito yija ñeñaro yi ãmobarisejũare, ñeñaro ya yũ. Ito bajiro yũ yija, “Dios ï rotirise quenarise ña”, yi tuoña yũ. ¹⁷Ito bajiri adocãta, ñeñaro yũ yirise yũmasi meje ya. Ñeñaro tuoñare yũre ñacõri, iti ña ñeñaro yiroca yũre yirise. ¹⁸Yũ masia, yũ tuoñarise quenarise ma yũre. Quenarise yũ yi ãmobarisejũare, quenarise yire ma yũre. ¹⁹Quenaro yũ yi ãmobarise, itire yibea yũ. Ito bajirojũare ñeñarise riti ya yũ, yũ ãmobarise. ²⁰Ito yija ñeñaro yũ yi ãmobarise yũ yija, yũmasi meje ya. Ñeñaro yire gaye yũre ñacõri iti ña ñeñaro yiroca yũre yirise.

²¹Ito bajiro riti bajisotia yũre. Quenarise yũ yi ãmobarise, no masia ma yũre, ñeñarise yũrejũ ñacõri. ²²Yũ ya usinama rujeguti Diore cudi ãmobarise yũ. ²³“Queno yũ yi ãmobarise, ñeñarise yũre ñacõri, queno canamũbea iti”, yi tuoña yũ. Yũ ya usinama Diore cudi ãmobarise yũ. Ito bajirojũare yũ ya rujuiti ñeñaro ya yũre. Ito bajiri ñeñarise jidicã masibea yũ.

²⁴Bujatoguti bajicõa yũ. Yũ ya rujuña ñeñaro yũ yirise waja jeame ãjũroju wacu yigujã yũ. ¿Ñimũjua yũre masogũ yiguũjida? ²⁵Ado robojuã bajia. Mani Uju Jesucristo yũre masocãni. Yũre yari Jesucristore cõañi Dios. Ito bajiri, “Queno ya mũ”, ya yũ ire. Yũ ya usi ñarocõnati ruje Diore cudi ãmobarise yũ. Ito bajirojũare ñeñaro tuoñare yũre ñacõri, iti ña ñeñaro yiroca yũre yirise. Queno yini Dios. Ñeñaro yũ yibititoni Jesucristore cõañi ï.

Espíritu Santore mani cudija Dios ñarã ñarã yirãji mani, yire gaye

8 ¹Cristo ñarã mani ñaja, ito yicõri ï rãca sigũre bajiro mani usi cutija, manire waja senibicu yiguũji Dios. Cristo ñarã ñari mani ya ruja ñeñaro iti tuoñaro bajiroti yi ãmomenaji. Ito yicõri Espiritu Santo ï rotiro bajirojuã yisotirãji mani. ²Mani ñeñaro yirise ñaroja mani godaroca yirise. Ito bajirojũare Jesucristore mani tuorũnuja, Espiritu Santo mani catitĩnaroca yigu yiguũji. Cristo yagu yũ ñajare, Espiritu Santo yũre ejabũagu yiguũji, ñeñaro yũ yibititoni. Ito yicõri jeame ãjũroju yũ wabore ñaroca yũre masocãni. ³Dios rotirise ñarocõti cudi jeo masia ma manire. Ito bajiri, “Dios ï rotirisere yũ cudire waja, yũre masogũ yiguũji”, yi masibea mani. Ado bajirojuã bajia. Dios ï Macũgorore adi macãrucũroju cõañi. Mani ñeñaro yiri ruju bajiro ruju cutiñi. Mani robo ruju cutibojaguti ñeñarise yibisĩ ï. ï ya rujuña ñeñaro yĩabicũ ñari, mani ñeñaro yirisere ñarocõti waja yi jeoni ï. Ito bajiri, “Ï ejabũarisena, ñeñaro yibicũja yũ”, yi masirãji mani. ⁴Ito bajiro manire goda ïsiñi ï, Dios rotirise bajiro quenarise mani yitoni. Adocãta ñeñaro mani tuoñarise rãca ñamenaji mani. Espiritu Santo ï ãmoro bajiro yirãji mani.

⁵Ñeñaro tuoñacõri ïna ñeñaro yiroti tuoñasotirã yirãji ïna. Espiritu Santo ï ãmoro bajiro yirãma, ï ãmoro bajiro riti yirona tuoñasotirã yirãji ïna. ⁶Ïna

ya ruju ñeñaro iti tuoñaro bajiroti tuoñasotirã, ña godaja bero jeame ñjuroju warã yirãji ñaõna. Ito bajibojarocati, “Espíritu Santo ñ ãmoro bajiro yicuja yu”, yirã, catitñarã yirãji. Ito yicõri ña ya usiju queno wanu quenarise rãca ñarã yirãji ña. 7Ñeñaro yire tuoñarã, Diore tuo terãji ña. Dios rotirise cudi ãmomenaji ña. Ito yicõri, no masia manoja ñnare. 8Ito bajiri, “Yu ñeñaro yirise riti yi wanu ñacuja yu”, yirã, Dios ñ ãmoro bajiro yi masimenaji ñaõna.

9Mani ya usiju Espiritu Santo ñ ñaja, ñ ãmoro bajiroti yirã yirãji mani. Ito yicõri mani ñeñaro tuoñarise bajiro meje yirãji mani. Espiritu Santo ñ ya usiju ñabeja Cristo yagu meje ñami ñocü. 10Riti ña, mani ñeñaro yiri ruju godaro yiroja. Ito bajibojarocati Cristo mani ya usiju ñ ñaja, catitñarã yirãji mani. “Quena ñama ña. Ñe seti ma ñnare”, yi boca ãmigü yiguñi Dios manire. Ito bajiri catitñarã yirãji mani. 11Espiritu Santona suoriti Cristo godarure mucana tudi ñ catiroca yinñi Dios. Mucana iti ñami mani ya ruju godarotire mucana tudi catiroca yirocã. Ito bajiro yigu yiguñi ñ manire. Espiritu Santo mani ya usiju ñ ñaja, catitñare gaye isigü yiguñi ñ manire.

12Ito bajiri yu ñarã, juaji ñeñaro yi uyabitoruja manire, iti rumu mani yicato bajiro. Espiritu Santo ñ ãmoro bajirojua yirãji mani. 13Ñeñaro mani tuoñarise mani yija, godarã jeame ñjuroju warã yirãji mani. Ito bajibojarocati Espiritu Santona suoriti mani ñeñaro yirise mani jidicaja, catitñarã yirãji mani.

14No Espiritu Santo ñ rotiro bajiro yirã, Dios rã ñama ña. 15Ado robojua baja. Espiritu Santo manire queo sãñi Dios. Ito bajiri moari masa ña ñjure güirã bajiro meje ña mani. Adocãta Dios rã ñre queno cudirã ña mani. Ito bajiri, “Yu Jacu, Cuna”, ya mani Diore. 16Espiritu Santo mani masiroca yami, “Dios rã ña mani”, mani yitoni. 17Ñi riati ñacõri, quenarise ñ goticãre boca ãmirã yirãji mani. Cristo rãca boca ãmirã yirãji mani, Dios ñ goticãre gaye. Cristo robo mani tõbujaja, ñ rãcati mani wanu quenaroca yigu yiguñi Dios manire.

Ija mani boca ãmiroti wanu quenare ñaro yiroja, yire gaye

18Adi rumuri ñeñaro mani tõbujaja, “¿No yicõri bujato tõbujati yu?” yi tuoñare ma. “Ñeñaro mani tõbujagore rëtoro ñasarise ña ñja ñmacuju mani wanu quenaroti gaye”, yi tuoña yu. 19Co rumu Dios ado bajiro yigu yiguñi: “Ña ñama yu rã yure queno cudirã”, yigu yiguñi Dios. Ñ rujeore ñarocõti buto bocatia, ñ ito bajiro yiroti. 20Dios cajero gaye, ñ rujeore gaye bajiro meje baja adi rumuri. Adi rumuri jeyaro jogarise riti ña. Ito bajiro rëtarotire cüsuyijju Dios, Adán ñ ñeñaro yirajuna suori. Ito bajiro riti bajitña yibetoja. 21Co rumu Dios ñ rujeore ñarocõti quenogü yiguñi ñ mucana. Ito bajiri ñ rã ñari mucana tudi juaji ñeñaro yimenaji mani. Adi rumuri jeyaro jogarise riti ña. Ija ñ wasoari rumu mucana tudi juaji jogabetoja iti. 22Mani masia, adocãta Dios ñ rujeore ñarocõti ñeñaro tõbujaja iti. Romio iso macu cutiro robo bajiro ñeñaro tõbujaja iti jeyaro. 23Mani cuni Jesure masirã, ñeñarise tõbujaja. Ito bajiri Espiritu Santo Dios manire queo sãre ñajare, “Ito bero juaji ñeñarise tõbujaja yibicuja ñja yu”, yi tuoña mani. Ito bajiri Dios mama ruju manire ñ isiroti

rujare, yurã yirãji mani. Iti ruju jogabeto yiroja, ito yicõri ñeñarise tõbujabeto yiroja. Ito bajiro ï yiri ramu, “Ána ñama yu ría”, yigu yiguñji. ²⁴Cristore mani tuorũnũrajuña suoriti, manire masoñi Dios. Mani tuoia yurise rëtagore meje ña. Rëtare gaye tuoia yu masimenaji mani. Rëtabiti gayereama tuoia yurã yirãji mani. ²⁵Rëtabiti gayere tuoia yurã, “Ito bajiro rëtarõ yiroja”, yì tuoia yucõri, ñe usirioari meje, bocatirãji mani. Ito yicõri, ñe usirioro meje mani bocatiroca ya iti.

²⁶Ito bajiroti Espiritu Santo manire ejabuami, mani queno masimena ñajare. Diore queno seni rucubuo masibea mani. Ito bajiri Espiritu Santo manire yari josa ïsiguñji Diore. “Diore yu seni amobojarise queno goti masibea yu”, yì mani tuoiarise masicõri, manire yari busi ïsigũ yiguñji ï Diore. ²⁷Mani tuoiarise tuo masi jeogu ñari, Espiritu Santo gotirisere tuo masi jeogu yiguñji Dios. Dios amoro bajiroti seni masicõri manire yari Diore senigũ yiguñji Espiritu Santo. Ito bajiri Dios sigũ tuo masire gaye busi masigũ ñari manire yari queno Diore busigu yiguñji Espiritu Santo.

Cristore tuorũnũrã ñari ñeñarisere rëtocurãji mani, yire gaye

²⁸Riti Diore mani maija, “Í amoro bajiro yu yisotitoni yure beseñi Dios”, yì tuoia masia mani. “Jeyaro yure rëtarise quenarise ña. Quenarise riti yure rëtaroca yigu ñami Dios”, yì tuoia masia mani. ²⁹Cajerojuti mani ïre tuorũnũronare masiñi Dios. Manire beseñi ï, ï Macu Jesucristo robo mani bajitoni. Ito bajiroti Dios ría ñarã, mani rjorũ ñami Jesús. ³⁰Cajerojuti ï ría ñaronare manire beseñi Dios. Manire besecõri, “Queno yirã ñama ña. Ñe seti ma ñare”, yì boca amiñi Dios. Manire boca amicõri, ï Macure ï yiado bajiro ñasarã mani ñaroca yigu yiguñji Dios manire.

³¹Iti oca quenarisere tuocõri, ¿no bajiro yirãti mani? Ado bajiro yiruja manire: “Dios manire ejabuagu yiguñji, ito yicõri manire jidicãbicu yiguñji. Ito bajiri no yibea gãjerã manire ña ti teja”, yiruja manire. ³²Í Macure maibojaguti, manire yari goda ïsi rotiñi Dios. Ito bajiri, “Riti ña. Ñe ruyabeto, jeyaro quenarise manire yì ïsigũ yiguñji Dios”, yì tuoia masia mani. ³³Dios manire boca ami wacu, “Quenarã ñama ña. Ñe seti ma ñare”, yini Dios. Ito bajiro ï yija, noajua gãjerã, “Seti ña ñare”, yì masimenaji. ³⁴Nijua mami, “Ína ñeñaro yirise waja, waja ruyurioama ña”, yigu. Mani ñeñaro yirise waja, waja yì jeoñi Jesús. Ito bajiri, “Íñare seti ña”, yibiquñji Jesús. Mucana caticõri, Dios ya riojocaduja rucubuaraju ñaguñji ï. Ito yicõri manire yari Diore busi ïsiguñji ï. ³⁵Manire bũto maiguñji Cristo. Ito bajiri ñimujua manire ï mairise jidicãroca yì masibiquñji. Mani yija, ñeñaro tõbujarã yirãji gajea. Mani yija, giurã yirãji gajea. Ña yija, gãjerã manire usirioro yì coderã yirãji gajea. Mani yija, ñiojogarã yirãji gajea. Iti yija, sãñare ruyaro yiroja gajea, manire. Mani yija, guijoroju warã yirãji gajea. Ña yija, gãjerã manire sjarã yirãji gajea. Iti jeyaro manire rëtabojarocati manire jidicãbicu yiguñji Jesús. Manire mai jidicãbicu yiguñji. ³⁶Ado bajiro gotiyju Dios oca goti ïsiri masu, ï oca tuti uca wacu:

Mu ñarã gua ñajare, co rumu ruyabeto guare gãjerã sãa ãmoama.

Ovejare ñna sãarocu bajiro guare yama, yiyijũ Dios oca goti ñsiri masũ.

³⁷Ñeñaro gua tõbujabojarocati, guare rëtocũmena yirãji gãjerã. Cristo manire maigũ ñ ejabuaja, jeyaro manire rëtarise ñemecuti sëorã yirãji mani. Cristore tuorũnucõri buto busa tuoia oca sëorã yirãji mani. ³⁸Disejua Dios manire ñ mairise jidicãroca yibetoja. “Riti ñaroja iti”, yi tuoia yu itire. Disejua mani catibojaja, mani godabojaja cuni, Dios ñ mairise manire camotabetoja. Dios ñaro gãna cuni, rũmũa cuni, ãmũa ñasari masa cuni, Dios manire ñ mairise jidicãroca yi masimenaji. Adocãta rëtarise, ija rëtaroti cuni, Dios ñ mairise camotaroca yibetoja manire. ³⁹Mani jubejũ ñabojaja cuni, ãmacũju mani ñabojaja cuni, no mani ñaroti Dios ñ manire mairise jidicãroca yibetoja. Disejua Dios ñ rujeore manire ñ mairise camota masibetoja. “Cristo mani Uju manire ñ yi ñsirañna suoriti buto maiami Dios manire”, yi tuoia mani.

Israel sita gãnare Dios ñ besere gaye

9 ¹Yu gotirise riti ña. Cristore tuorũnugũ ñari ñ yagu ña yu. Ito bajiri socabea yu. “Espiritu Santo ñ ejabuarisena riojo oca gotia yu”, yi tuoia yu. ²“Jesucristore tuorũnu ãmobeama yu ñarã”, yi tuoiacõri buto bojori buja yu. ³Ñnare maigũ, jeame ãjuroju ñna ware ãmobeaa yu. Ñnare jeame ãjuroju Dios ñ cõame yirocu, yũjuare ñ cõa ãmojama camotabitibogũja yu. ⁴Ñna ñama yu ñarã, Israel ñayoru janerãbatia. Jane mejeju ñnare besebojayijũ Dios ñarã ñna ñnatonĩ. Ñ masirise, ñoyijũ Dios ñnare. Ito yicõri ñ rotirise cuni ñnare gotibojayijũ ñ. “Ado bajiro yicõri yure mũa rũcubũore ãmoa yu”, yiyijũ Dios yu ñarã ñnasuoanare. “Queno muare yigu yigũja yu”, yiarĩ goti yucãyijũ Dios yu ñarãre. ⁵Yu ñarã bucũrã ñnasuoana janerãbatia ñama ñna. Cristo cuni yu ya butu gaguti rujeañi. Cristoti ñami Dios, masa ñarocõreti rotigu. Coji ruyabeto ñre rũcubũotĩñaruja manire. Ito bajiro riti bajitĩñajaro.

⁶Yu ñarã, judio masare, Dios oca quenarise ñ gotibojarocati coriarãti ñama ñre bajiro tuoiarã. “Judio masare Dios ñ goticãdo bajiroti yibeami”, yi tuoĩabitirũja manire. Judio masa rujeabojarãti jeyaro Dios ñarã meje ñarãji ñna. ⁷Abraham janerãbatia, ñna ñarocõti, ñ janerãbatia goro meje ñama, Dios ñ tija. Ado bajiro Abrahamre gotiñi Dios: “Mu macũ Isaac ñ rĩa ñna ñarã yirãji mũ janerãbatia goro”, yiyijũ Dios Abraham ñayoru. ⁸Iti oca tuocõri, “Abraham janerãbatia riti rujeare, Dios rĩa ñama ñna, yireoni meje ña iti”, yi tuoia mani. Ado bajirojua baja: Dios ñ goti cũrise tuorũnũrã, ñna ñama mũcana tũdi rujeana, ito yicõri Dios rĩa. Ito bajicõri Abraham janerãbatia goro bajiro bajiamã ñna ñja. ⁹Ado bajiro goti yucãyijũ Dios Abrahamre: “Ijaca rodo adocõ tũjarocati wadigu yigũja yu. Ito yicõri mũ manojõ Sara wame cutigo macũ rucogo yigõji iso”, yiyijũ Dios Abrahamre.

¹⁰Adiacã riti meje ña. Ado bajiro baja gaje. Ñna macũ Isaac jai tujacõri, Rebeca rãca manojõ cutiyijũ ñ. Rĩa sũrũayijõ iso. Ito bajibojarocati jacũama

sīgūti ñayijũ. ¹¹⁻¹³Iso rucoroto riojua, ado bajiro gotiyijũ Dios isore: “Mu macũ ñasũogũ ï ocabajire moa ïsiri masũ ñagũ yigũiji ï”, yiyijũ Dios, Rebecare gotigũ. Jane mejeju ito bajiroti gotiyijũ Dios ï oca tutina. Ado bajiro bajiyijũ: “Esaú rêto busaro maia yũ Jacobre”, yiyijũ Dios ï ocana ñna jũarã rujearoto riojua. Quenarise, ñeñarise cuni ñna yibetoju, gotiyijũ Dios itire maji. Ito bajiri, “Dios ï tũoĩaro bajiro beseami masare. ñna yigorena sũori meje beseguĩji Dios. Ñ amoro bajiroti beseguĩji”, yi tũoĩa mani.

¹⁴“Gãjerãre bese, gãjerãre besebiti ï yija, ñeñaro yami Dios”, yi tũoĩabojama coriarã. Ito bajirojua meje baja. ¹⁵Dios sīgũti bese masiguĩji ï. Ito bajiri ado bajiro yiyijũ Dios, Moisés ñayorũre: “Yũ amõrãrecõti ñnare ti maigũ yigũija yũ”, yiyijũ Dios Moisés ñayorũre. ¹⁶Dios queno yami masare. Ñ ti mairo roboti yami. Masa ñna queno yire amõja meje, ito yicõri bũto ñna moaja meje, ï ti mairo bajiro queno yami Dios masare. ¹⁷Ucara tutina ado bajiro yiyijũ Dios Egipto gagũ ujũre: “Uju mũre cũcũ yũ, mũna sũoriti yũ masirise masare ïorocũ. Ito bajiro yicũ yũ masa jeyaro yũ gayere ñna tũo jeditioni”, yiyijũ Dios, Egipto gagũ ujũre. ¹⁸Iti tũocõri, “Ñ ti mairãre riti ti maiguĩji Dios. Ito yicõri, ‘Yũre cũdibicũre ñre cũdibitiroca yigũ yigũija yũ’, yicõri, ï amoro bajiro yigũ yigũiji Dios”, yi tũoĩa mani.

¹⁹Ito bajiro bajija tũocõri, “¿No yija, ‘Muare seti ña’, yigũ yigũijida Dios manire?” yirãji mũa coriarã. “Dios ï amoro bajiro yibicũja yũ, yi masigũ mami”, yirãji mũa. Ito bajiro yũre mũa busija, ado bajiro muare cũdicũja yũ: ²⁰Ito bajiro busibitirũja mũare. “Dios ï yire quenabea”, yiado ma mũare. Riri sotũ, “¿No yija yũre ito bajiro yũre meniri mũ?” yibetoja iti sotũ menirore. ²¹Riri sotũ meniri maso iso amoro bajiroti menigõji. Iti ririnati quenari sotũ iso meni amõja, menigõji. Itinati ejori iso meni amõja rocati busa bajiro menigõji iso amoro bajiroti.

²²Iso yiado bajiroti ï amoro bajiro yigũ yigũiji Dios cuni. Ñ masirise ïo amobojaguti ito yicõri masa ñna tõbũjaroca yi amobojaguti, itire yibisijũ Dios. Ado robojua baja. “Ñnare ruyuriorũja yũre”, yibojaguti, ñeñaro ñna tõbũjaroca yi usiriobisijũ Dios. ²³Ito bajiro yĩni Dios, mani ï ti mairãre, “Ñti ñnami rêtoro masigũ”, mani yi tũoĩatoni. Cajerojuti manire ti maicõri beseñi Dios, ï masirise manire ïsirocũ. ²⁴Mani ñre tũorũnũtoni, manire beseñi Dios. Mani coriarã judio masa ñna. Gãjerã judio masa meje ñna. Ito bajibojarocati mani ñnarocõreti beseñi Dios. ²⁵Ado bajiro baja Dios ï yire, Oseas ñayorũ ï ucare jane mejeju gaye:



(Romanos 9.20-21)

Yũ ñarã mejere cuni, “Yũ ñarã ña mua”, yigũ yigũja yũ. “Cajero muare ti maibiticũ yũ. Adocãta muare ti maia yũ”, yigũ yigũja yũ. 26 “Yũ rĩa meje ñama”, Dios ï yiadojũ, ñnati Dios rĩa ñarã yirãji. Dios catitĩñagũ rĩa ñarã yirãji. Ito bajiro ucayoñi Oseas jane mejeju. 27Isaíasjua, ado bajiro busiyoyiju, Israel sita gãnare tũoĩa yugu: “Israel gãna jãjarã busa bujuama. Jai rëtocúcõri, ja sitacõ jãjarã ñama ñna. Jãjarã ñna ñabojarocati coriarãreti masogũ yiguĩji Dios. 28Dios ï goticãdo bajiroti yigũ yiguĩji. Jãjarã adi macãrucũro gãna masa, ñna ñeñaro yirise waja, ñnare waja senigũ yiguĩji Dios. Ito yicõri cojisiti ñnare ruyuriogu yiguĩji”, yi ucañi Isaías. 29Ito yicõri, ucaguti ado bajiro yiyiju Isaías:

Dios masa jeyaro uju ñagũ, mani rĩa sigũre ï masobeto bajija, mani judio masa jeyaro maniboana mani. Dios Sodoma, Gomorra gãnare ï ruyurioado bajiro, manire yiboru, manire sigũ ï masobeto bajija. Ito bajiro yiari ucañi Isaías.

Cristo ocare judio masa ñna tũo ãmobitire gaye

30Riti ñna. Itire tũocõri ado bajiro yi tũoĩa masia mani: “¿No bajiro yirũjati guare, Dios riojo, ‘Quena ña mua’, ï yitoni?” yi tũoĩabisijarã judio masa meje ñarã. Ito bajibojarocati, “Queno yirã ñama. Ñe seti ma ñnare”, yigũ yiguĩji Dios, Cristore ñna tũorũnũja, yi tũoĩa masia mani. 31Yũ ñarã, judio masama ado bajiro yi tũoĩabojayijarã: “Queno gua yija, ‘Queno yirã ñama’, yigũ yiguĩji Dios guare”, yi tũoĩabojayijarã ñna. Dios ï rotirise ñnarcõti, ñna cãdibejare, “Queno yirã ñama ñna”, yi masibisiju Dios. 32Ado bajiro bajia. Judio masa Diore tũorũnrã meje ñayijarã. “Quenaro gua yirise ticõri, ‘Queno yirã ñama ñna’, yigũ yiguĩji Dios”, yi tũoĩabojayijarã ñna. Cristore boca ãmimena ñnari, masa ñna camota cũado bajiro Dios tũ eja masibisijarã ñna. Cristore ñna boca ãmi ãmobeja, gũtagã camotado bajiro bajiami ï. 33Itire ï oca tutina ado bajiro busiami Dios:

Sión wame cutiri cũtoju Cristore cũa yũ. Gũtagã camotado bajiro bajigu Cristore cũa yũ. Ñre ñna tũorũnubeja camotagu yiguĩji ï. Ito bajiri yũ tũ eja masimena yirãji ñna. No Cristore tũorũnugũti bojori bujabicũ yiguĩji. Wanũ quenagũ yiguĩji ï. Ito bajiroti gotiyiju ï oca tutina, jane mejejuti.

10 1Tũoya, Jesure tũorũnrã mua. Gãjerã yũ ñarã, Dios jeame ãjuroju ï cõabore, ï masoja, bũto itire wanũ quenagũja yũ. Iti ñna Diore yũ seni tũoĩarise. 2Yũ ñarã, Israel gãna, Dios ï ãmorise ñna tũoĩarisena bũto yi ãmbojama ñna. Ito bajibojarocati, “Iti ñna ï ãmorise”, yi tũoĩa masibeama ñna. 3“Cristo mani ñeñaro yirise waja yicãñi. Ito bajiri Dios ï tija, seti ma manire”, yi tũoĩabeama ñna. “Ï rotirise gua cãdija, ‘Queno yirã ñama ñna’, yigũ yiguĩji Dios”, yi tũoĩabojama ñna. Ito bajibojarocati Dios ï ãmoro bajiro yibeama ñna. Ito yicõri Diore queno tũorũnubeama ñna. Ito bajiri, “Queno yirã ñama ñna”, yibiquĩji Dios. 4Cristo ï ejaja bero, ñna suoriti manire masogũ yiguĩji Dios. Adi rãmuri, no Cristore tũorũnugũti, “Ï ñami queno yigũ. Seti macũ ñami”,

yiguĩji Dios. Cristo ĩ goda ĩsirajuna suoriti manire masoguĩji Dios. Ito bajiri, “Dios rotirise mani cudirajuna suoriti manire masogũ yiguĩji”, yire ma ĩja.

⁵ Moisés ñayoru jane mejeju ado bajiro busiyiju: “No Dios rotirise ñarocõti cudigu catitĩnare bujagu yiguĩji”, yi ucayiju Moisés ñayoru. ⁶ Ito bajibojarocati, sigũju mami Dios rotirisere ñarocõti cudigu. Cristore masa ĩna tuorũnuja ticõri, “Queno yirã ñama ĩna. Seti ma ĩnare”, yigu yiguĩji Dios. Iti ocare ado bajiro gotia manire, Dios oca: “¿Ñimũ ũmacũju tigu ejayijari? ‘Itoju gagu wadirũ ñami Cristo’, yi masiana”, yirona. Ito bajiro tuoĩabitiruja muare.

⁷ “¿Ñimũ godana tujũ ejarũda Cristo ĩ tujaja tirocu?” yi tuoĩabiticõruja muare.

⁸ Dios oca ado bajiro gotia: “Dios riasore gaye ñacã muare. Ito bajiri iti riasore gaye masicã mua. ĩ riasore gayere busiyija mua”, yi gotia Dios oca. “Cristore masa tuorũnũre amogũji Dios”, yire gaye ña iti oca. Ito bajiro masare riasoa gua iti oca. ⁹ “Jesús ĩ godaja bero mucana tũdi ĩ catiroca yĩni Dios”, mani yi tuoĩaja, ito yicõri “Jesús ñami yũ Uju”, mani yija, jeame ũjuroju mani wabore ñaroca manire masoguĩji Dios. ¹⁰ Cristore mani tuorũnuja ticõri, “Queno yirã ñama ĩna. ĩnare seti ma”, yigu yiguĩji Dios. Ito yicõri, “Jesure tuorũnũgũ ña yũ”, yi gãjerãre mani goti rãtobuja, riti Dios ĩ masoana ñarã yirãji mani ĩja.

¹¹ Ado bajiro gotia Dios oca tuti: “No ĩre tuorũnũrã, ‘Bujato baja yũre’, yirã mama”, yi gotia Dios oca. ¹² Dios ĩ tija judio masa, judio masa mejere cuni, coro bajiro ti tiguĩji ĩ. Mani Uju ñami ĩ, ito yicõri jeyaro Uju. No ĩre senigũre queno yigu yiguĩji Dios. ¹³ Dios oca tuti ado bajiro gotia: “No Jesure, ‘Yũ Uju ña mũ. Yũ ñẽnaro yirisere acabojoya. Jeame ũjuroju yũ wabore ñaroca yũre masoña’, yirã masoana ñarã yirãji”, yi gotia Dios oca. ¹⁴ Cristore ĩna tuorũnũbeja, ĩre seni masimenaji ĩna. Ito yicõri Cristo gayere ĩna tuobeja, ĩre tuorũnũ masimenaji ĩna. Sigũ ĩnare Cristo oca riasobeja, masimena yirãji ĩna. ¹⁵ ĩ oca gotirona mani cõabeja, ĩ oca riasorã manaji. Ado bajiro gotia Dios oca: “Dios oca quenarise riasorã, no ĩna gotiroju masa ĩna tuoja, wanũ quenarã yirãji ĩna”. Ito bajiro ucare ñayija jane mejejutĩ.

¹⁶ Masa jãjarã oca quenarise tuobojarãti itire tuorũnũbeama ĩna. Jane mejeju Isaías ĩ ucado bajiro ti baja: “Yũ Uju, coriarãti ñama mũ ocare tuorũnũrã”, yiyiju Isaías Diore gotigu. ¹⁷ Cristo oca quenarise ĩna tuobeja, itire tuorũnũmenaji ĩna. Cristo ocajuare tuosũoruja, ĩna tuorũnũroto rioju.

¹⁸ Adire muare seniãgũ ya yũ: ¿Israel sita gãna Dios oca tuobitanada? Tuobojana tuorea. Dios oca tuti ado bajiro gotia:

Dios oca gotiri masa, masa jeyarore goti jeõni. Ito yicõri ĩna oca coju ruyabeto, tuore ña.

¹⁹ Mucana muare jabeto seniã tuogũ ya yũ. ¿Dios oca tuobojarãti, queno tuo masibisijari Israel sita gãna? Tuo masibisijarã ĩna. Moisés ñayoru ĩti ñami cajero iti oca gayere ucasũoru. Dios ĩ gotiro bajiro ti ucayiju ĩ. Israel sita gãnare Dios ĩ tuoĩare gaye gotigu ado bajiro ucayiju Moisés ñayoru:

“ ‘Tuo rãtobubeama ĩna’, mua yirãre, ‘Yũ ñarã ña mũ’, yigu yiguja yũ ĩnare. Ito bajiro yũ yija, bũto rorã yirãji mũ. Ito yicõri bũto junisinirã yirãji mũ”, yiyiju Dios, yi ucayiju Moisés ñayoru.

20 Moisés ï ucaja bero bũto oca s̄ocõri, ucayijũ Isaías. Dios ï yiro bajiroti ucayijũ ï c̄ni:

“Yũre ãmabitibojanajũa yũre bũjama. Ito yicõri yũre masi ãmomenajũare, yũre ïna masiroca yicũ yũ”, yiyijũ Dios judio masa meje ñarãre c̄ni tũoĩagũ, yi ucayijũ Isaías ñayorũ.

21 Israel sita gãna ïna bajirisejũa, Dios ï gotirisere ucayijũ Isaías: “Co r̄ũmũ r̄ũyabeto ïnare jisotiboja yũ, ïna ñeñaro yirisere ïna jidicãtoni. Ito bajibojarocati yiro robo cũdirã meje ñama ïna. Ito yicõri yũre ti terã, tudiana ïna”, yiyijũ Dios, yi ucayijũ Isaías ñayorũ.

Coriarã Israel sita gãnare Dios ï masore gaye

11 ¹“Dios ñarã Israel sita gãna ïnare jidicãcõrũ”, yire ʔtũoĩati m̄ua? Meje ïnare jidicãbeami. Israel sita gagũti ña yũ c̄ni. Ito bajiri yũ ñicũ ñasũorũti ñami Abraham ñayorũ. Ito yicõri Benjamín ya butu gagũti ña yũ. Ito yicõri Benjamín janerãbatia janamiti ña yũ. ²Jane mejeju gãa Israel gãnare beseñi Dios, ï ñarã ïna ñatoni. Ito yicõri gũare jidicãbeami ï. Dios oca tutijũ Elías ñayorũ ï oca gayere tiyija m̄ua. Dios rãca busigũ, “Israel gãnare seti ña”, yire gaye yiyijũ Elías ñayorũ. Tite. Ado bajiro yiyijũ ï, Diore busigũ: ³“Yũ ʔjũ, m̄ure goti ïsiri masare s̄iayijarã Israel sita gãna. M̄ure r̄ũcũbũorã ïna soe ïs̄isotira casabo c̄ni ruyurioñi ïna. Ito yirã ñari, yũre c̄ni s̄ia ãmocã ïna. Yũ sigũti m̄ũ oca gotiri masũ catia maji”, yiyijũ Elías Diore. ⁴Ito bajiro ï yija tũocõri, ado bajiro cũdiyijũ Dios: “M̄ũ sigũ meje ña. Siete mil ñarã masa ñama maji yũre r̄ũcũbũorã. Gãjerã ïna meni rujeorũ Baal wame cutigũre ñini r̄ũjũ r̄ũcũbũo yibiticã ïna”, yiyijũ Dios Elías ñayorũre. ⁵Elías ï ñaratũa, Dios ï beseado bajiroti adocãta c̄ni Israel gãna coriarãre beseguĩji Dios, ï ñarã ïna ñatoni. Ñnare ti maicõri ïnare beseñi Dios. ⁶Ïna queno yirena sũori meje beseñi Dios. Ñnare ti maicõri beseñi ï. Ïna queno yirena sũori ï besero bajija, ïnare waja yirocũ robo beseborũ ï. Quenarise ïna yibitibojarocati, ïnare ti maicõri beseñi Dios.

⁷Ado robojũa bajia. Israel sita gãna, “Queno yirã ñama ïna”, ï yire ïna ãmobjarocati, “Queno yirã ñama ïna”, yibisijũ Dios. Coriarãti Dios ï beseana, “Ïna ñama queno yirã”, yiyijũ Dios. Gãjerãma Dios oca tũo ãmomena ñayijarã ïna. ⁸Ïna gayere busia Dios oca tuti. Ado bajiro gotia: “Ïre ãmomenare ï oca ïna tũo masibitiroca yiyijũ Dios ïnare. Ito bajiri gãjerã ï ocare ïna gotibojarocati tũo masibisijarã ïna. Ito bajiroti bajia adi r̄ũmũri c̄ni”, yi gotia Dios oca tuti. ⁹Ado bajiro yiñi David ñayorũ Diore:

Israel gãna wanũ quenarã, basa ïna menirise bojori bũjaroca yiya.

Ïna tũoĩa bũjatobitiroca yiya. Ito yicõri ïna ñeñaro yirise waja, ïnare waja seniña.

¹⁰Ïna tũo masibitiroca yiya. S̄igũ r̄ũcũrise ãmi wacũ robo bajiro, ïna ñeñaro yirise tãniroca yiya m̄ũ, yiyijũ David ñayorũ Diore.

Judio masa mejere cūni Dios ī masore gaye

¹¹ ¿No bajiro tūoīati mua? Dios judio masare, ĩre ĩna āmobejare, ĩnare jidicā ruyuriogū yiguījida? Meje ĩnare jidicā ruyuriobiquīi Dios. Judio masa Diore ĩna āmobeja, judio masa mejereama masogū yiguīi Dios. Ito bajiro gājerāre ī masoja ti masicōri, āmotirā yirāji judio masa cūni. ¹²Judio masa Diore ĩna cūdebjare, jaje quenarise gaye masa jājarāre ejayijū. Judio masa Cristore ĩna tūorūnubejare judio masa mejere cūni jaje quenarise gaye ejayijū. Ito bajiri Cristore tūorūnūoyijarā ĩna cūni ĩja. Judio masa cūni Cristore ĩna tūorūnūja, būto būsa masa jeyarore quenarise ejaro yiroja.

¹³Mua judio masa mejere cūni busigū ya yū. Mūare Dios oca gotire ũa yūre. Mūare yū riasotoni yūre cūni Dios. “Iti ũa moare ũasarise”, yi tūoīa yū. ¹⁴Yū ũarā judio masa, mūare bajiro ĩna bajire āmogū, itire gotia yū. Dios mūare masoja masicōri, āmotirā yirāji ĩna cūni. Ito yija Cristore tūorūnūrā yirāji gajea. Ito bajiro ĩna yija ticōri, ĩnare masogū yiguīi Dios. ¹⁵Judio masare Dios ī jabeto jidicārajū, masa jeyarore oca quenarise cūyijū Dios, ī rāca ĩna queno ũatoni. Ito bajiro ī oca cūyijū Dios judio masa mejere cūni. Ito bajiri Cristore ĩna tūorūnūja Dios ũarā ũarāji ĩna cūni. Būto būsa quenaroja, judio masa cūni Cristore ĩna tūorūnūja. Jeame ũjurojū ĩna wabore ũaroca ĩnare masogū yiguīi Dios. Ito bajiri godabojarāti mūcana tūdi catirā robo bajirā yirāji ĩna. ¹⁶Ado bajiro baja. Jabeto cūjabūra gaye, boca āmicōri, Dios ī quenoja, ũarocōti cūjabūra quena jedicoaro yiroja. Yucūgū ũe, jeyaro iti quenaja, jeyaro rūjuri cūni quena jediroja. Ito bajiro bajiyijū Abraham ũayorū. Queno yigū ũari, Diore tūorūnūyijū ī. Ito bajiri ī janerābatia Diore ĩna tūorūnūja, queno yirā ũarā yirāji ĩna cūni.

¹⁷Cogū yucūgū, olivo wame cutiricū, rūjū jatacōacōri, rocati judiragu rūjū āmicōri wōja, cogū gaye bajiroti bajiroja. Ito bajiroti Dios cūni judio masare cōacōri, judio masa mejere cūni, mūare ī ũarā ũatoni cūni ī. Ito bajiri Dios ye quenarise būjacōri gua judio masa rāca sīgūre bajiro bajirā ũa mua. ¹⁸Ito bajiro Dios ī yija, “Judio masa rēto busaro queno yirā ũa gua”, yi tūoīabitirūja mūare. “Judio masare mani riojuajū beseñi Dios”, yire gayere tūoīañā mua. Cristo judio masū ī rujearena suoriti mūare masoñi Dios. Ito bajiri, “Judio masa rēto busaro queno yirā ũa mani”, yiado ma mūare.

¹⁹Mua judio masa meje ũarā, ado bajiro yiborāji gajea: “Judio masare jidicāyijū Dios, ī ũarā mani ũatoni. Ito bajiri ũasari masa ũa mani”, yi tūoīabojarāji gajea mua. ²⁰Riti ũa, judio masare Dios ī jidicāre. Cristore ĩna tūorūnubejare, ito bajiro yiñi ī, ĩnare. Cristore mua tūorūnubeja, mūare cūni cōacōborū ī. Ito bajiri, “Judio masa rēto busaro ũari masa ũa mani”, yi tūoīabesa mua. “ũasarā meje ũa mani”, yi tūoīañā mua. Ito bajiro tūoīacōri, “Queno ya Dios mū”, yiya, ĩre rūcūbuorā. ²¹Dios judio masare, cajero ī beseanare ī cōaja, mūare cūni cōa masiguīi ī. ²²“Jaje quenarise gaye yami Dios masare. Ito yicōri masare būto ĩna tōbūjaroca cūni yami Dios”, yi

tuoñaña mua. Ado bajiro baja. Ìre r̄c̄ub̄uomenare b̄uto ìna t̄ob̄ujaroca yibojaguti muare queno yami. Ito bajibojarocati mua ìre r̄c̄ub̄uot̄iñabeja, muare c̄uni c̄oc̄oc̄or̄u ì. ²³Judio masa ì c̄oana, Cristore ìna t̄uor̄un̄uja ì ñarã ñaroca yigu yiguji ì mucana. Ì masirisena, ì ñarã ñaroca yi masiguji mucana. ²⁴Judio masa meje mua ñabojarocati ì ñarã bajiro muare c̄uni Dios. Judio masa ñama cajero Dios ì beseana. Cajero ì beseana meje mua ñabojarocati josari ì ñarã mua ñaroca yiñi Dios. Judio masa cajero ì beseana mucana ì ñarã ñaroca ì yija, josari mejeti ñaraja.

Israel sita ḡanare Dios ì masosusare gaye

²⁵Ȳ ñarã, masa ìna masibiticati gayere, muare gotigu ya ȳ. Dios ì beseana ña mani. “Jeyaro masirã ña mani”, mua yi tuoibititoni, iti gaye ocare muare gotia ȳ. Adoc̄ata judio masa j̄ajarã ñama Diore tuo ãmomena. Ito bajiro bajit̄iñamenaji ìna. Judio masa meje ñarã, Dios ì besec̄ana, Jesure ìna t̄uor̄un̄uja tic̄ori, judio masa c̄uni Diore ãmorã yirãji ìna. ²⁶Ito bajiro judio masa Diore ìna ãmoja, jeame ãjuroj̄u ìna wabore ñaroca ìnare masoḡu yiguji ì. Ito bajiro ucare ña Dios oca tutij̄u:

Sión wame c̄utiri c̄utoj̄u ejaḡu yiguji masare masori mas̄u. Jacob janer̄abatiare ìna ñeñaro yirisere coeḡu yiguji ì.

²⁷Ito bajic̄ori, ñeñaro ìna yirise ȳ ãcabojaja, jane mejej̄u ȳ goticãdo bajiroti yiḡu yiḡuja ȳ, yi gotia Dios oca tuti.

²⁸Adoc̄ata judio masa j̄ajarã Cristo oca quenarise r̄c̄ub̄uomena jaicoama. Ito bajiri Dios wajana ñama ìna. Ito bajiro ìna bajijare, mua judio masa mejej̄ua t̄uor̄un̄usuoã mua. Judio masa ìna Diore ãmobitibojarocati, ìj̄uama ìnare ti maiguji maji. Ìna ñic̄usabatiare c̄uni ti maiñi ì. Ito bajiri adi rum̄ari ḡana judio masare c̄uni ti maiami ì maji. ²⁹“Ìnare besec̄u ȳ. Ito bajiri ìnare queno yiḡu yiḡuja ȳ”, yiyij̄u Dios. Ì goticãdo bajiroti yiḡu yiguji ì. Ì goticãdo bajiroti jidic̄abic̄u yiguji Dios. ³⁰Cajero Diore cudibisija mua. Judio masa Diore ìna cudibeja tic̄ori, muajuare maic̄ori, muare masoñi ì. ³¹Adoc̄ata judio masa Diore cudirã meje ñama. Ito bajiro ìna bajibojarocati, muare ì ti mairo bajiroti, ija ìnare c̄uni ti maiḡu yiguji ì. ³²Mani jeyaro Diore cudimena riti ñac̄u mani maji. Ñeñaro mani yi ãmoja manire camotabis̄i Dios. Ito bajiro yiñi, ñeñaro mani yija bero, “B̄uto ȳre maisac̄oḡuji Dios. Ìre ȳ ñeñaro yirise ȳ goti r̄etobuja, ȳre ãcabojoḡu yiguji”, mani yi tuoia masitoni.

³³Quenasac̄oã. Quenoguti yiḡu ñami mani Jac̄u Dios. Jeyaro masiḡu ñami ì, ito yic̄ori jeyaro tuo masiḡu. Ì tuōarisere masibea mani. Ito yic̄ori ì yirisere ti masibea mani. ³⁴Ado bajiro gotia Dios oca tuti: “Ñim̄uj̄ua Dios ì tuōarise tuōaḡu mami. Ñim̄uj̄ua Diore riasoḡu mami. ³⁵Ñim̄uj̄ua mami, ‘Diore ìsic̄u ȳ. Ito bajiri ȳre waja ruyurioami ì’, yiḡu”. Ito bajiro ucare ñayija jane mejej̄uti. ³⁶Adi sita ñarotire jeyaro rujeoñi Dios. Ìna suoriti jeyaro ña. Ito yic̄ori ì ye riti ña. Ito bajiro ì bajijare ìre r̄c̄ub̄uot̄iñac̄or̄uja manire. Ito bajiro riti bajit̄iñajaro.

Dios í amorise riti mani yija quena, yire gaye

12 ¹Dios manire ti maicōri jaje mani yerotire yīni. Ito bajiri yu ñarā Dios í amorise riti yirā ñaña mua. Quenarise riti yiya, ñenarise yimenati. Mũa ito bajiro yija, Dios wanu quenagū yigūji mua rāca. Diore mani rucubworise ire ñorona ito bajiro yirūja mani. Ito bajiro mua yitoni, oca sēoro muare rotia yu. ²Diore masimena ña yiro bajiro yibesa. Mame tuoïare gaye wasoacōri, quenarise riti tuoïaña mua. Ito bajiro tuoïacōri Dios í amorise masirā yirāji mua. “Diore quena ña”, yire gaye masirā yirāji mua. Ito yicōri í wanuroti gaye cūni masirā yirāji mua. “Iti ña yure ñasarise”, Dios ye yire gaye masirā yirāji mua.

³Yure ti maicōri í oca muare gotirocure yure cūni Dios. Ito bajiri ado bajiro muare gotia yu. Mani ire tuorūnurā ñajare manire moare cūni í. “Ire yu moa ísi masitoni yure ejabuagu yigūji Dios”, mani yi tuoïaroca yami Dios. Ito bajiri, “Yumasi queno Diore moa ísia yu”, yi tuoïabitorūja manire. Ado bajirojua mani tuoïaja quena. “Dios í ejabuarisena riti queno moa masia yu”, yi tuoïarūja manire. ⁴Mani ya ruju jaje ña. Tite mua. Amo, cajea, gāmoro, gūbo jaje ña mani ya ruju. Co ruju gaye ricati riti moare cutia mani ya ruju. Tite mua. Cajeana ti, gāmorona tuo, āmona āmi, gūbona wa ya mani. ⁵Ito bajiroti baja mani Jesucristore tuorūnurā. Ire tuorūnurā ñari í ya ruju robo bajirā ña mani. Ito bajiri jājarā ñabobarāti sīgure bajiro tuoïacōri gāmeri ejabua mani. Ito yicōri mani yagu sīgū í manija gāmeri godo cutia mani.

⁶Í amoro bajiro mani jeyarore, ricati riti mani moa masirotire jidicāni Dios. Dios manire jidicāre mani moa masirisena ire queno moa ísirūja manire. Dios í oca gotiroti gayere muare í jidicāja, Cristore mua tuorūnurocō gotija quena. ⁷Gājerāre ejabuare gaye manire Dios í jidicāja, gājerāre queno ejabuaja quena. Ito yicōri, no riasore gaye boca āmigū gājerāre queno riasoja quena. ⁸Gājerā oca sēoroca yi masigū, queno yija quena. No gājerāre í ísi āmoja, queno wanu quenaro jairo ísija quena. No rotigū quenoti rotija quena. No bojori bujarāre ejabuagu, wanu quenare rāca ejabuaja quena.

Cristore tuorūnurā ado bajiro ñaja quena, yire gaye.

⁹Buguti gājerāre mai ruobesa. Gājerāre maisaguti maija quena. Ñenaro yirere ti tecōri jidicāña. Quenarise riti yi āmoña. ¹⁰Cristore tuorūnurā ñari sīgū rīa robo bajiro gāmeri queno ti maiña. Ito bajiro yicōri queno gāmeri rucubwoya mua.

¹¹Dios moare gaye muare í cūre tuoïa wanucōri moaja quena. Diore wanurā í amoro bajiroti ire queno moa ísiña mua.

¹²“Guare queno yigu yigūji Dios”, yi tuoïa yurā ñari, queno wanu quenaro ñaña mua. Mũa tōbujaja, ñemecutiya. Muare oca ñaja, usiriobeja. Ito yicōri Diore busi jidicābeja mua. Ire mua busisotija quena.

¹³Cristore masirā ña bojoro bujaja, ñnare ísima. Mũa ya wi ejarāre queno boca āmima.

¹⁴Jesure masirã mua ñajare gãjerã ñeñaro muare ñna yija, ñeñaro ñnare busitubeja. Dios ñnare queno yitoni, Diore senima mua.

¹⁵Gãjerã queno ñna wanu quenaja, queno corocõ ñna rãca wanuma mua cuni. Gãjerã ñna bojori bujaja, cocati bojori bujaba mua cuni.

¹⁶Gãjerã jeyarore queno ti mai ñaña mua. “Ñna rêto busaro queno yirã ña mani”, yi tuoïabesa mua. “Ñasamena ñama ñna”, gãjerã yianare cuni baba cuticõri, queno wanu quena ña mua. “Gãjerã rêto busaro masia yu”, yi tuoïabesa.

¹⁷Gãjerã ñeñaro muare ñna yija, ñnare gãmebeja mua. Quenarise riti yiya mua, gãjerã, “Ñeñaro yirã ñama”, ñna yibititoni. ¹⁸Gãjerã rãca gãmeri ti tudibesa mua. Ado bajirojua mua yija quena. Queno mua yi masirise yiya, masa jeyaro rãca queno mua ñatoni. ¹⁹Queno tuoya yu ñarã mua. Gãjerã ñeñaro muare ñna yibojarocati ñnare ñeñaro yibeja mua. Muare ñeñaro yirãre ñeñaro ñna tõbujaroca yi masiami Dios, ñnaõnare. Ñ oca tutina ado bajiro gotiami Dios: “Yu ña, masa ñna ñeñaro yire waja, ñeñaro ñna tõbujaroca yiri masu. Ñna ñeñaro yire waja, ñnare waja senigũ yigũja yu”, yiari gotiami mani Uju ñ oca tutina. ²⁰Gaje ado bajiro gotia Dios oca: “Mua wajacu ñ niocõja, ñre bare ecaya. Ñ idi ãmoja, ñre ioya. Ito bajiro mua yija, mua wajacu ñeñaro yi ãmogũ, muare bojobjaja tigũ yigũji”, yi gotia Dios oca tuti. ²¹Gãjerã ñeñaro muare ñna yibojarocati ñnare ñeñaro yibeja muama. Ñnare quenarise riti yiya mua. Ito bajiro mua yija ticõri, ñna ñeñaro yirisere jidicãrã yirãji gajea.

13 ¹Dioti ñami mani ujarãre cõri masu. Dios ñ cõana ñajare, mani ujarãre yiro robo cudiruja manire. ²Ujarãre ti tujabicu, ñna rotitoni Dios ñ cõanare cudiguõcũ meje ñami ñocũ. Ito bajiro cudimenare, ñna tõbujaroca yigũ yigũji Dios. ³Queno yiri masare gũiri masa meje ñama rotiri masa. Ñeñaro yiri masajuare gũiri masa ñama rotiri masa. Ito bajiri quenarise riti yiya mua. Quenarise riti mua yija ticõri, muare ti wanurã yirãji mua ujarã. ⁴Mani queno ñatoni rotiri masare cõni Dios. Mani ñeñaro yija, gũirã yirãji mani. “Yu ñeñaro tõbujaroca yigũ yigũji”, yi tuoïacõri gũirã yirãji mani. Ñeñaro yirãre ñna tõbujaroca yironare rotiri masare cõni Dios. ⁵Ito bajiri juaji tuoïare gaye tuoïacõri rotiri masare ñna yiro bajiroti cudirona ña mani. “Yu cudibeja ticõri, yu tõbujaroca yigũ yigũji Dios”, yi tuoïarã cudija quena. Ito yicõri, “Yu cudija iti ña queno yire gaye”, yi tuoïacõri, ñna yiro bajiroti cudiruja manire. ⁶Rotiri masa ñna moarise yiro robo ñna moaja, Diore yiari moa ñsirã yama ñna. Ito bajiro ñna yitoni ñnare cõni Dios. Ito bajiri rotiri masa ñna waja senija, ñnare waja yija quena.

⁷Mua waja ruyuriorãre cuni waja yiya. Ujarã ye niyeru seni ñsiri masare waja yiya. Gaje ujarã ñna waja yirotiya, ñna rotiro bajiroti waja yiya. Ito yicõri ñna yiro bajiroti yiya mua. Mua ujarã ñnarocõreti rucubuoja. ⁸Gãjerãre waja ruyuriobesa. Sigure ruyabeto gãmeri ti maisotiya. Ito bajiro gãmeri mua ti mairise jidicãbeja mua. No ñ tu gãnare ti maigũ, Dios ñ rotirise cudiguti ñami ñocũ ñja. ⁹Dios ñ rotirise ado bajiro gotia: “Gãji manojore ajebesa. Gãjerãre

sĩabesa. Rinibesa. Ito yicõri gãji ya gajeonire ti ðobesa”, yi gotia Dios ĩ rotire. Dios ĩ rotirise ñarocõti ado bajiro riti gotia: Gãjerãre mua ti maija, ñnare ñeñaro yimenaji mua. Ito yicõri ñnare mua ti maija, Dios ĩ rotiriserẽ cudi jeorã ñarã yirãji mua. Ito bajiri muamasiti mua mairo bajiroti, mua tu gãnare cuni ti maiña. ¹⁰No ĩ tu gãnare ti maigũ, ñnare ñeñaro yibicu yiguĩji. Ito bajiri mani tu gãnare mani ti maija, ñnarocõti Dios ĩ rotirise cudirã ñarã yirãji mani.

¹¹Dios ĩ rotiro bajiro riti yiruja manire. Ñamicaju ña ĩja. Nocõ mejeti mani Uju ejagu yiguĩji manire ãmi warocu. Ito bajiri ña yucãruja manire. Cajero ĩ oca mani tuorũnruja, “Co rumu tudi ejagu yiguĩji Jesús”, yi tuoĩacu mani. Ito bajibojarocati adi rumu, “Nocõ mejeti ruja manire ĩ masogu ejaroto”, yi tuoĩa masia mani ĩja. ¹²Adocãta ñami bajiro baja, masa ñeñaro ña yija. Ñami rãta waju, nocõ mejeti mani Uju ĩ tudi ejaroti rumu ejaro yiroja. Itocõti ejagu yiguĩji ĩ. Ito bajiri ñeñaro mani yire gayere jidicãruja manire. Gãjerã rãitãroju ñeñaro ña yiro bajiro yibitiruja manire. Ado bajiroju yiruja manire. Quenarise riti yiruja, busuro ñarã queno ña yiro bajiro. ¹³Quenarise riti yiruja manire, masa ña tiro riojo queno mani yiro bajiro. Basa ña meniroju wabitiruja manire. Ñeñaro ña ajeroju mecubitiruja manire. Gãji manojore ajebitiruja manire. Mani ya ruju ñeñaro iti tuoĩaro bajiroti ñeñaro yibitiruja manire. Gãjerã tudibitiruja manire. Gãjerã mani rãtoro ña masija ticõri, ñnare ti junisinibitiruja manire. ¹⁴Ado bajiroju mani yija quena. Mani Uju Jesucristore tuorũnruja manire. ĩti ñami manire ejabuagu, mani ñeñaro yibititoni. Ito bajiri ĩ ejabuarisena mani ya ruju ñeñaro iti tuoĩaro bajiroti yi uyabitiruja manire.

Cristore tuorũnruãre busitubesa, yire gaye

14 ¹Queno Jesure tuorũnruabicu ñabojaguti sigũ mua rãca ĩ ña ãmoja, ĩre boca queno ãmiña mua. “Ito bajiro bajigu ñami”, yi ti masicõri ĩ rãca gãmeri busi tuoĩabeja ñasabitire. ²Ado roboju baja ñasabiti gaye. Coriarã Jesure masirã, “Jeyaro mani baja cuni quena ña”, yi tuoĩama ña. Gãjerã queno Jesure masisamenama, “Waibucu ri ba jidicãruja. Ote gaye riti mani baja quena”, yi tuoĩama ña. ³Ñarocõti jeyaro barã, gãjerã ba jidicãrãre busitubiticõruja ñnare. Ito bajiroti ba jidicãrãju cuni, jeyaro barãre busitubiticõruja. Cristore tuorũnucõri, Dios ñarã ñama ña ĩja. Ito bajiri ñnare busiture ma. ⁴Jesure tuorũnrã, Diore moa ĩsiri masa ñama ñaõna. ña ujarã meje ña mua. Dios ñami ña uju. Ito bajiri Dios ña uju ñari, “Queno ya mua yãre”, ito yicõri, “Queno yibea mua yãre”, yiguĩji ĩ. Dios sigũti ĩre moa ĩsiri masare ña queno yitoni yi masiami.

⁵Coriarã Jesure masirã ado bajiro tuoĩama: “Adi rumu Diore rucubũora rumu ñasari rumu ña gaje rumu rãtoro”, yi tuoĩama ña. Gãjerãmoa ado bajiro tuoĩama: “Co rumu rujabeto corocõ Diore rucubũoruja mani”, yi tuoĩama ña. Mani jeyaro sigũ rujabeto, “Yu yisotire, ñeñarise meje ña”, yi masiruja manire. ⁶Sigũ, “Adi rumu ña ñasari rumu”, yi tuoĩagũ, ito bajiro yami mani Ujure rucubũogu. Gãji, “Co rumu rujabeto corocõti

ña”, yi t̄uoĩagũ, ĩ c̄uni Diore r̄ũcũbuore gayeti ito bajiro yami. Gãji jeyaro bagu, Diore r̄ũcũbuorocuti bami ĩocũ c̄uni. ĩ baja, “Queno ya Dios mu”, yiguĩji ĩ. Gãji waibucu ri ĩ ba jidicãja, ito bajiro yami ĩ c̄uni Diore r̄ũcũbuogu. “Queno ya Dios mu”, yiguĩji ĩ c̄uni.

⁷Mani Cristore masirã, mani t̄uoĩarise riti yi ãmorã meje ña mani. Ito bajiri, “Yu ãmori r̄umu godacuja yu”, yimenaji mani. ⁸Mani catirocõ, mani Uju Cristo ĩ ãmoro bajiro yirona ña mani. Ito yicõri ĩ ãmorocõ godarãji mani, ĩ rãca ñarona. Ito bajiri mani catija c̄uni, mani godaja c̄uni Cristo ñarã ña mani. ⁹Ado robojua baja. Cristo godacõri mucana tudi catiĩni godarã uju ñarocu, ito yicõri catirã uju ñarocu c̄uni.

¹⁰¿No yija gãjerã Jesure masirãre seti yiati mua? ¿No yija gãjerã Jesure masirãre ñeñaro t̄uoĩa busiati mua? Mani ñarocõti Cristo riojo ñarã yirãji mani, mani queno yigore, mani ñeñaro yigore c̄uni, ĩ cõiatoni. Iti masicõri mani ñarãre, “Īnare seti ña”, yibitiruja manire. ¹¹Ado bajiro gotia Dios oca tuti:

Catia yu. Ito bajiri yu gotirise riti ña. Masa jeyaro yu riojo,
rijomunigãna ñini r̄ujũrã yirãji, yure r̄ucũbuorona. Sīgũ r̄uyabeto,
“Dios ña mu”, yirã yirãji, yi gotia Dios oca tuti.

¹²Iti t̄uocõri, “Mani jeyaro sīgũ r̄uyabeto, jeyaro mani yigorore Diore goti r̄etõrã yirãji mani”, yi t̄uoĩa mani.

Cristore t̄uorũnurãre ĩna jidicãroca yibesa, yire gaye

¹³Ito bajiri gãmeri busitubiticõruja manire. Ado bajirojua quenarise riti yiruja manire. Ito yicõri mani rãca gãna Cristore masirã, ĩna ñeñaro yiroca yimenaji mani. ¹⁴Yuma Cristore masigũ ñari, “Jeyaro yu baja quena ña”, yi t̄uoĩa yu. “Iti yu baja, ñeñarise ña”, yi t̄uoĩabojaguti ĩ baja, ñeñaro yigu yami ĩocũ. ¹⁵Sīgũ Cristore masigũ, “Rẽore gaye ña”, ĩ yi t̄uoĩarise mani baja ticõri, bojori bujagu yiguĩji gajea. Ito bajiri ĩ bojori bujaroca mani yija, ĩre ti mairã meje ña mani. Īnaõnare yiari c̄uni goda ĩsiĩni Cristo. Ito bajiri sīgũ Cristore masigũ mani baja ticõri, Cristore ĩ jidicã ãmoja, babiticõruja itire. ¹⁶Gua yirise quena ña”, yi mua t̄uoĩabojarocati, “Ñeñaro yama ĩna”, yi gãjerã muare ĩna busituja, yibeja itire. ¹⁷Īre t̄uorũnurãre riti ĩ rotiroju miojugu yiguĩji Dios. Ito bajiri mani barise c̄uni, mani idirise c̄uni ñasarise meje ña. Mani Uju ĩ rotiro bajiro mani cudija, iti ña ñasarise. Ito yicõri gãjerã rãca queno mani ñaja, iti ña ñasarise. Espiritu Santo mani wanũ quenaroca ĩ yija, iti c̄uni ñasarise ña. ¹⁸Cristo ĩ ãmoro bajiroti mani yija, “Queno yirã ñama ĩna”, yigu yiguĩji Dios. Ito yicõri masa c̄uni ito bajiroti yirã yirãji.

¹⁹Ito bajiro yiruja mani, gãjerã rãca ñe oca manoti queno mani ñatoni. Ito yicõri gãmeri ejabuato mani, Cristore buto busa t̄uorũnuana yirona. ²⁰Sīgũ, “Rẽore gaye bama ĩna”, yi wacu Diore ĩ jidicã ãmoja, babitiruja mani. Bare jeyaro mani baja quenarise ñaroja. Ito bajibojarocati gãji, “Rẽore ña iti”, yi wacu, mani baja ticõri, Cristore ĩ jidicã ãmoja, babitiruja mani itire. ²¹Gãji

Cristore masigũ, rẽore gaye mani baja ticõri, ito yicõri uyé ide mani idija ticõri, Cristore jidicãgũ yigũiji gajea. Ito bajiri Cristore ï jidicãbititoni, jeyaro rẽore gaye babitiruja manire. Ito yicõri idire idibitiruja manire. Mani yirise ticõri, Cristore ï jidicã ãmoja, yibitiruja mani itire. ²²“Jeyaro yũ baja quenaroja”, mani yi tuoïaja, Diore riti gotija quena. No, “Yũ yisotirise quena ña Dios ï tiro riojo”, yi masigũ, wanũ quenagũ ñami iocũ. ²³No, “Yũ baja quenabetoja iti”, yi masibogauti, ï baja, seti ñaroja ïre. “Yũ baja quenabetoja gajea”, yibogauti, ï bajare seti ñaroja ïre. “Yũ yija quenabetoja gajea”, yibogarãti, mani yija, seti ñaroja manire.

Mani ñaroti gaye riti meje tuoïaja quena, yire gaye

15 ¹Mani Diore queno tuorũnrã, gãjerã queno Diore tuorũnũsamenare ejabuaruja manire, ñeñaro ñna yibititoni. “Rẽore ña”, ñna yi tuoïare gaye yibiticõruja mani. Ito yicõri mani wanũroti gaye riti yibitiruja manire. ²Ado bajirojua yiruja manire. Mani tũ ñarãre ñna wanũ quenaroja yiruja manire. Ito yicõri ñnare queno yiruja mani, Diore buto busa ñna tuorũnũtoni. ³Cristo cuni ï rioti ï wanũroti gayere yibisĩ ï. Ado robojua bajiyija. Dios oca tuti ucare bajiroti rêtayija. Ado bajiro yiyijũ Cristo, ï Jacure: “Jeyaro ñeñarise mure ñna busigoreti, yure rêtacu ïja”, yi ucare ñayija jane mejejutu. ⁴Jane mejeju Dios ï busigore ucare ñayija. Quenarisejua mani yi riasotitoni bajiyija iti. Ito bajiri itire mani riasotija, ñeñaro tõbujabogarãti usiriomenati ñemecuticõrãji mani. Ito yicõri queno wanũ quenarã yirãji mani. “Dios ï goticãdo bajiroti jeyaro rêtaro yiroja”, yi tuoïa yucõri, queno wanũ quenarã yirãji mani. ⁵Dios ñami mani ñemecutiroca yigũ, ito yicõri mani tuoïa oca seoroja yigũ. Sigũre bajiro mua tuoïa wanũroca yijaro ï, Cristo ï ãmoro bajiro. ⁶Mani Eju Jesucristo Jacũ Diore mua rũcũbuotoni, ito bajiro yijaro Dios muare. Ito yicõri sigũre bajiro usi cuticõri, “Ï ñami rêtoro masigũ”, mua yi tuoïatoni, ito bajiro yijaro Dios muare.

Judio masa meje cuni Pablo Cristo oca ï gotire gaye

⁷Cristo manire ï boca ãmiado bajiroti, gãjerãre boca ãmiña mua cuni. Ito bajiro mua yija, masa muare tirã riti, “Queno yigũ ñami Dios”, yirã yirãji ñna. ⁸“Adi macãrucũrojure judio masare ejabuagu wadiñi Cristo”, ya yũ muare. Ito bajiro yĩni Cristo, “Jane mejeju gãnare Dios ï goticãdo bajiroti yĩni”, mani yi masitoni. ⁹Gaje ado bajiro wadiñi Cristo. “Masare ti maigũ ñari rêtoro queno yigũ ñami Dios”, judio masa meje cuni ñna yi masitoni, ado wadiñi Cristo. Dios oca tuti iti gotiado bajiroti ado bajiro gotiñi Cristo Diore:
 Judio masa meje tuoro riojo, “Mũ ña rêtoro masigũ”, yi mure rũcũbuogũ yigũja yũ. Mure rũcũbuogũ mũ wame basa seacũja yũ, yiyijũ Cristo Diore. Ito bajiro yi ucare ñayija jane mejejutu.

¹⁰Ito yicõri gaje ado bajiro ucare ña:

Mua judio masa meje cuni, Dios ñarã judio masa rãca wanũ quena ñna mua, yiari ucare ñayija.

¹¹Ito yicõri ado bajiro ucare ñayija gaje:

Judio masa meje, ito yicōri masa jeyaro, “Rētoro queno masigū ñami Dios, ito yicōri rētoro queno yigū ñami Dios”, yi rūsɓɓɔjaro ñna, yi ucare ñayija.

¹² Isafas ñayoru ado bajiro ucañi:

Isaí ñayoru janerābatia janami sīgū rujeagu yiguñi. Judio masa meje ɓu ñagū yiguñi i. Īre tuorñncōri, “Manire masogū yiguñi”, yirā yirāji ñna, yi ucare ñayija.

¹³ “Dioti ñami manire masorocɓ”, yi tuoña mani. Īre senia yu, mua Īre tuorñncōri queno corocō mua wanɓ quenatoni, ito yicōri queno corocō mua ñatoni. Gaje Īre senia yu. “Espíritu Santona suoriti manire masogū yiguñi”, yi mua tuoña wanɓtoni Diore senia yu.

¹⁴ Yu ñarā, queno yirā ña mua, ito yicōri Cristo gayere queno masirā ña mua. Ito bajiri gāmeri riaso masia mua. Yi tuoñasacōa yu itire. ¹⁵ Ito bajibojarocati adi paperana muare oca sēo busaro gotia yu. Ito bajiro muare ya yu, mua tuogore mua tuo bujatonɓ, ito yicōri mua ācabobabitoni. Sēoro muare papera cōa yu, Dios yure ti maicōri ito bajiro i cūjare. ¹⁶ Mua judio masa mejere cuni Cristo oca quenarise riasotoni yure cūni Dios. Cristore tuorñnɓjaro ñna, yirocɓ muare riasocɓ yu. Adocāta Īre tuorñnɓrā ñari Espiritu Santona suoriti Dios ñarā ña mua ĩja. Ito bajiri queno wanɓ quenacōri muare boca āmigū yiguñi Dios. Itire tuoñagū muare riasoa yu.

¹⁷ Jesucristore tuorñncōri Diore moa ĩsia yu. Ito bajiri wanɓ quenacōri, “Jesucristo i ejabuarisena Diore queno moa ĩsia yu”, yi tuoña yu. ¹⁸⁻¹⁹ Iti riti muare gotia yu. Yure ejabuañi Cristo, mua judio masa mejere cuni Īre mua cūdiroca yu yitoni. Yu riasore gaye tuocōri, queno yu yire gaye ticōri, ito yicōri Espiritu Santona suoriti tiyamani yu yija ticōri, Cristore tuorñnuyija mua ĩja. Ñaro bajiroti Cristo oca quenarise riasocɓ yu. Jerusalénjuna yu goti wadija, gaje cūtori jeyaro goticōri, Ilirijaju goti ejaɓu yu itire. ²⁰ Cristo gaye ñna tuoñamena ñarajɓ, Cristo masare i masore gaye ñnare riasogɓ wasoticɓ yu. Gājerā ñna riasocādojɓre, riasogɓ wa āmobiticɓ yu. ²¹ Ito bajiro yu yija, Dios oca tuti iti ucado bajiroti bajicɓ. Ado bajiro gotia:

Ī oca tuobitiana tuorā yirāji. Ito yicōri tuo rētoɓurā yirāji, yi ucare ñayija.

Romajɓ Pablo i wa āmore gaye

²² Jaje cūtori yu riaso ucure ñajare mua tu wa āmoboɓaguti wa masibiticɓ yu maji. ²³ Adi sitajure moare tiocōa yu ĩja. Canɓ meje mua tu wa āmoboɓaguti, wa masibiticɓ yu maji. Ito bajiri adocāta mua tu wacɓ ya yu ĩja. ²⁴ Españaɓ wacɓ, muare ti rēta wacɓ yiguja yu. Mua rāca yu wanɓ quenaja bero yure mua ejabuare āmoa yu, España yu eja masitoni. ²⁵ Ito bajibojarocati cajero Jerusalénju wacɓ ya yu maji, Cristore tuorñnɓri masare niyeru āmi wacɓ. ²⁶ Macedonia sita gāna, ito yicōri Acaya sita gāna cuni, ado bajiro tuoñayijarā ñna: “Jerusalén gāna Jesure masirā, bojoro bujarā yirāji coriarā.

Ito bajiri niyeruna ñnare ejabuaraja mani”, yi tuoñayijarã ñna. Niyeru miojucõri yure ñisicã ñna. Ito bajiri iti niyeru Jerusalén gãnare ñisigũ wacu ya yu.

²⁷Macedonia sita gãna, ito yicõri Acaya sita gãna, judio masa meje ñnaborarãti, “Jerusalén gãna judio masare, ñnare ejabuaraja mani”, yi tuoñayijarã ñna.

Cajero maji judio masa mejere cuni Dios masare ñ masore gaye riasoyijarã judio masa maji. Ito bajiri adocãta judio masa meje ñnarã judio masa bojoro bujarãre, ejabuaja quena. ²⁸Jerusalén gãna Jesure masirãre iti niyeru yu ñsija bero, Españaju wacu muare ti rãta wacu yiguja yu. ²⁹Mua tu ejaõõri Cristo gayere yu riasoja, mua wanũroca yigu yiguõji Cristo.

³⁰Yu ñnarã Cristore tuõrũnurã ña mua. Ito yicõri Espõritu Santona suõrõti gãmeri ti maia mua. Ito bajiri yure yiari Diore mua senitoni muare usirio codea yu. ³¹Judea gãna Jesure masimena yure ñeñaro ñna yibitõni, Diore busi ñsina mua, yure yiari. Ito yicõri gaje ado bajiro Diore seniña, Jerusalén gãna Cristore masirã, bũto wanũ quenacõri, yu niyeru ñmi warise ñna boca ñmitõni. ³²Ito bajiro yure yiari mua busi ñsija, Dios ñ ñmoro bajiroti mua tu wanũ ejaõõ yiguja yu. Ito yicõri queno usi cuticõri gãmeri ejabuarã yirãji mani. ³³Mani sajari oca cutiroca yigu ñami Dios. Mua rãca ñatĩñajaro Dios, ya yu. Ito bajiro riti bajitĩñajaro.

Quenajaro masa, Pablo ñ yi ñucare gaye

16 ¹Mani yago Febe wame cutigo mu tu ejaõõ yigõji. Queno yigo ñnamo iso. Cencrea wame cutiri cuto gãna Jesure masirã rãca Diore yiari moa ñsiri maso ñnamo iso. ²Jãjarãre ejabuani iso. Ito yicõri yure cuni ejabuacõ iso. Mani Ujure tuo mairã ñari, isore queno boca ñmima mua. Mani Cristore masirã ñari, gãjerã Cristore masirãre mani gãmeri boca ñmija quena. Ito bajiri isore boca ñmicõri, jeyaro mua ejabuacõ isore ejabuaba.

³Quenajaro Aquila, ito yicõri ñ manõjo Priscila cuni. Jesucristo gaye yu riasotoni, queno yure ejabuacã ñna. ⁴Yure gãjerã sia ñmorã ñna josaja, yure ejabuabõjari godacobocã ñna. Ito bajiri, “Quenoguti yicã ñna”, ya yu ñnare. Yu sigũ meje, “Queno yicã”, ya yu. Judio masa meje cuni Cristore masirã, ito bajiroti yama ñna cuni. ⁵Quenajaro, Diore rucubõrona Aquila ya wi minijuarã. Quenajaro yu rãca gagu yu baba, Epeneto cuni. ñ ñami cajero Asia sita gagu Cristore tuõrũnũsuõru. ⁶Quenajaro mani yago María cuni. Yoari mua rãca moani iso. ⁷Gua comasi ñnarã cuni, Andrõnico, ito yicõri Junias cuni, Quenajaro. ñna rãca tubiara wiju ñnacu gua. Ito yicõri yu riojua busa Cristore tuõrũnũsuõni ñna. “Queno yirã ñnama Andrõnico, ito yicõri Junias cuni”, yama Cristo ñ cõana.

⁸Quenajaro yu baba Ampliato cuni. Mani Uju yagu ñ ñajare bũto ñre maia yu. ⁹Quenajaro Urbano cuni. Mani rãca Cristore moa ñisigũ ñami ñ. Quenajaro yu baba yu maigũ Estaquis cuni. ¹⁰Quenajaro Apeles cuni. Jeyaro ñ moagore ticõri, “Cristore queno tuõrũnũgũ ñami ñ”, yi tuoña mani. Quenajaro Aristõbulo cuni, ñ ya wi gãna ñarocõti. ¹¹Quenajaro gua comasi, Herodiõn cuni. Quenajaro Narciso

cūni, ī ya wi gāna ñarocō Cristore masirā cūni. ¹²Quenajaro Trifena, ito yicōri Trifosa cūni. Īna romia jūarā ruje moacā mani Ujū Jesure yiari. Quenajaro mani yago Pérsida cūni. Iso cūni ruje mani Ujūre yiari moacō. ¹³Quenajaro Rufo cūni. Masa jeyaro, “Buto Cristore tuorūnūgū ñami ī”, yama ĩna. Quenajaro ī jaco. Yū jacoōcōti ñamo iso cūni yūre. ¹⁴Quenajaro Asíncrito, Flegonte cūni, Hermas cūni, Patrobas cūni, Hermes cūni. Ito yicōri ĩna rāca Cristore tuorūnūrā ĩnacōti quenajaro. ¹⁵Quenajaro Filólogo, Julia cūni, Nereo cūni, ito yicōri ī ocabajio cūni, Olimpās cūni. Ito yicōri ĩna rāca Cristore tuorūnūrā ĩnacōti quenajaro.

¹⁶Mani comasi Cristore masirāre queno wanūcōri gāmeri boca āmima mūa. Cristore tuorūnūrā ñarocōti, “Quenajaro”, yama mūare.

¹⁷Yū ñarā ado bajiro gaje mūare gotigū ya yū. Coriarā ñama masa batatoni oca menirā. Ito yicōri Jesús gayere ĩna riasoja, mūa tuogore bajiro meje riasoama ĩna. Īnare mūa tūoja, “Roya”, yirocū mūare gotia yū. Īnare camotadiya mūa. ¹⁸Mani Ujū Cristore yiari meje moama ĩna. Īna tūoīaro bajiroti yama ĩna. Īna busija, būroti quenarise bajiro ruyua. Quenarise meje ña iti. Ito bajiri queno tūo masimena ĩna busirisere tuorūnūbojama ĩna. ¹⁹“Dios oca queno cūdirā ñama ĩna”, yama masa jeyaro mūare. Ito bajiri mūare wanūa yū. Quenarise gaye riti mūa yire āmoa yū. Ito yicōri cojireā ñenarise mūa yimena ñare āmoa yū. ²⁰Dioti ñami mani queno corocō ñaroca yigū. Nocō mejeti rūmūa ūjū Satanásre mūa rētocūroca yigū yigūiji Dios mūare. Mani Ujū Jesucristo queno mūare yijaro.

²¹Yū rāca moagū Timoteo, “Quenajaro”, yami mūare. Ito yicōri gūa comasi Lucio, Jasón cūni ito yicōri Sosípater, “Quenajaro”, yama ĩna mūare.

²²Yū Tercio, Pablo ī rotiro bajiro adi papera menia. Yū Jesure masigū ñari, mūa Jesure masirāre, “Quenajaro”, ya yū.

²³Gayo cūni, “Quenajaro”, yami mūare. Ī rāca ī ya wijū ña yū. Ado ī ya wijū Jesure masirā minijuasotiana ĩna. Īna cūni, “Quenajaro”, yama mūare. Ito yicōri Erasto, adi cuto gagū niyeru seori masū, “Quenajaro”, yami mūare. Ito yicōri mani rāca gagū Cristore masigū Cuarto wame cutigū “Quenajaro”, yami mūare.

²⁴Mani Ujū Jesucristo, mūa ñarocō jeyarore queno mūa ñaroca yijaro. Ito bajiro riti bajitīñajaro.

Diore rūcūbuorūja manire, Pablo ī yisusare gaye

²⁵Diore rūcūbuorū ñari, “Queno yigū ñami ī. Rētoro masigū ñami ī”, Diore yi rūcūbuorūja mani. Ī ocare queno mūa tuorūnūja, mūa tūoīa oca sēoroca yi masigūiji Dios. Iti oca ña, Cristo masare ī masore gaye, yū riasorise. Cajerojūti jane mejejū masare riasore meje ñayija iti. ²⁶Ito bajibojarocati adocāta masirāji masa itire, Dios oca gotiri masa itire ĩna ucajare. Masa jeyaro iti oca tuorūnūcōri ĩna cūditoni, Dios catitīñagū, iti oca riasore gaye cōañi.

²⁷Jesucristore tuorūnūrā ñari, “Buto masigū ñami Dios. Ī sīgūti ñami jeyaro masigū”, yi rūcūbuotīñarūja manire. Itocō ña.